

# *BUETELELI*

 Ni itumezi, Muzwale Williams. Litumeliso, Muzwale Salano ni musala hae, ni baeñi kaufela mwa mukopano wo busihu bwa kacenu. Kaniti ki litohonolo lelituna fa kuba mo. Ni bile ni libelela hola ye kuzwa fo lukalezi ka mukwa wo.

<sup>2</sup> Mi Ni—Ni bata kuitumela ku kalibe yani, Ni palezwi kuhupula libizo la hae, Billy na ni bulelezi fela kuli, na ni file kapongisi ka maswiti a Kilisimasi, mi na ka tisize fela kwa mota nako nyana yefitile. Kezeli, Hanikoni kuhupula libizo la hae, uzwa ona kwanu kwa California. Yani neli mpo yaka ya pili ya Kilisimasi. Kacwalo Ni—Ni itumezi ka yona.

<sup>3</sup> Cwale, busihu bwa kacenu ki... Cwale mwa Tucson seli mizuzu ye lishumi kasamulaho wa naini, kono Ni sepa kuli seli fela mizuzu ye lishumi kasamulaho wa eiti kwanu. Kacwalo lwa... Ni na ni mufuta wa maikuto mwahala sicaba, Ni bang'a ya ngolangisanga hahulu ha ni kutaza, kacwalo Na—Na sepa... [Puteho ya kambela—Mu.] Ni itumezi. Ha ki... batu kwa bunde ni bao mwahali mo. Na itumela ku mina.

<sup>4</sup> Kono Ni—Ni katalizwe ka nako yetelele nyana, bukaufi, busihu bwa kacenu, Ni bile ni zamaya hahulu fa nako yetelele kuzwa—kuzwa kwa Shreveport ni kwa buse bwa na ha (kutaha ka nzila ye) busihu ni busihu, mi kipeto muba fela ni—muba ni ku katala nyana, mwa ziba, ni silami, mi mumizo wa mina wa silela linzwi. Ne ni kalezi kwa Shreveport. Ne ni felezwi ki milili ya ka ha ne Ni li... lilimo nyana ze fitile. Mi Ne nina ni kaemba nyana ko Ni tinanga ha Ni kutaza mwa na ha ya mutulo, kusilelezwa kwa ku sa kenelwa ki silami. Ne niile kwa Shreveport mi se ni ka libala, mi kaniti Na kenelwa ki salami luli. Moya wani ha ufuka mwateni cwalo, kaniti hamusa ziba fela. Ne ka tubuzwi ka ku itibala, mi litalo lisali le li bunolo, mi ni mufufuzo o likani fela mi kipeto se Ni tasezwa fa mumizo; ne ni na ni kukwala mikopano ya ka. Kacwalo Ni bile fela ya silezi linzwi nyana busihu bwa kacenu.

<sup>5</sup> Lubata kubulela kuli lubile ni nako yende fa kutaha kwanu, niteñi, mwa mikopano. Busihu bwa maabani ne lubile ni nako yende kwa... ni bana bahesu, kwani, kwa neku leliñwi. Mi kacwalo neli nyangela yetuna ni kopano yende ya babañata, batu neli baba likute mi babande. Kacwalo si ni eza kuikutwa bunde luli ka kuba siemba sa Baana ba Pisinisi Yetezi ya Evangel. Se kubile kuli...

<sup>6</sup> Ni na ni Liñusa, Na ikutwa, kuzwa ku Mulimu. Ki le linca nyana kwa batu babañwi. Mi ha Ni koni kuba ka nzila isili hape... Ni lukela fela kuba se Ni li sona. Mi luna... Ha ni talusi

kuba ya shutana, fela ki kuli Ni—Ni pila mwa nako ye cinca. Lusweli ku . . .

<sup>7</sup> Iibile fela muyaha limota ka mukwa o namile, kipeto ku lukile, ba—ba yahi bakona kushetumuka fa limota cwalo. Kono cwale hamuna ni ku sikuluha fa lilulu, fani kona fo nako. . . Mi halu yahi limota; luyaha ndu, mwa bona, kacwalo malulu aa alukela kutaha. Na tile mwa lusika lwa Martin Luther, John Wesley, ni lusika lwa Pentekota; ki a fa hape. Kacwalo lwa . . . kutata fa ku sikuluha lilulu. Kono Ni itumezi hahulu ka . . . ku Mulimu, kamba kuba cwani zetata, batu ba bile ba tahanga ka buñata luli. Kacwalo lu itumezi hahulu, ni i tumela ku mañi ni mañi wa mina.

Mi cwale lusika kwalula kale Buka, halu amboleñi ku Mukalisi wa yona, haiba mulata, fa muzuzu fela, halunze luinamisa litoho zaluna:

<sup>8</sup> Mulimu Yomunde, lu itumela ku Wena busihu bwa kacenu ka litohonolo la kuziba Jesu Kreste (Mupulusi wa luna) Mwana Hao, ka kuswalela libi za luna ni bumaswe kusina tifo, ni ka kuziba kuli Mali a Hae a lulikana ona a apesize libi za luna ni bumaswe bwa luna. Li takuzwi luli ni kunepelwa mwa nuka ya Mulimu ya ku libala mi Munyaliwa wa Hae uka yema kwa Mulalelo wa Linyalo, akenile, yasina nyazo, ni kunyalwa ku Mwana Mulimu. Ka mo lu itumela ku Wena ka mata amatuna a ni tumelo ya kuziba kuli ha lu sepi mwa bunde bwa luna bañi kono mwa bunde bwa Hae fela, ka sa Na lu ezelize. Lu itumezi hahulu.

<sup>9</sup> Lu itumezi ku Wena ka—ka kuitisa ko mizwale ye ibile ni kona kwa buse bwa mawate ni linaha kwani ko ba na ni tala ni linyolwa la Mulimu. Na lapela, Mulena, kuli ha ba ka yo kuta hape, kuli bana bani be ba tisize mwa Mubuso bakaba bo kuku babatuna ba baana ni ba basali ba bana bo ba tisize teni ni bona. Lumeleza cwalo, Ndate.

<sup>10</sup> Lu fuyole hamoho, busihu bwa kacenu, mi Moya o Kenile ulufe lika ze lu tokwile. Kwala milomo ya luna kwa lika ze lu sa lukeli kubulela, mi ukwalule lipilu zaluna kwa ku amuhela Seo ubata ku lu bulelala. Lumeleza cwalo, Ndate. Ka Libizo la Jesu lwa lapela. Amen.

<sup>11</sup> Cwale halu apuleñi mwa Bibele kwa palo nyana ye Ni tabelia kubulela ka yona fa nako nyana busihu bwa kacenu, mi ifumaneha ku Muhalalehi Mareka, kauhanyo yabu 10.

<sup>12</sup> Mi Ne ni bile ni . . . Lilimo nyana ze fitile hane Ni kutazanga, Ne ni sa—Ne ni sa ñolangi mane ni haiba ka pampili, Ne ni kona ku hupulanga. Mi Ne ni sina magilasi a kubalisa mwa Bibele. Kono kakuli se Ni fitelezi lilimo ze mashumi amabeli ka ze ketalizoho cwale, habeli, mi se kuli tata nyana kuna kuli—kuli ni eze sina mo ne Ni evezanga. Mi kuswana sina mota ye se katezi, kono Ni sa kona kumata. Uh-huh, Ni bata kuzwelapili

ku pañata cwalo kufitela ikaba . . . Niya fa libunda la lisipi ku yo bupiwa since hape. Yani kona sepiso.

<sup>13</sup> Muhalalehi Luka, kauhanyo yabu 10, ni kukalela fa . . . Ni sepa Ne ni bulezi kuli timana ya 21, haiba Ni kona kuifumana kokuñwi mo. Ni lyanganisize, ki Muhalalehi Mareka. Muni swalele.

<sup>14</sup> Muhalalehi Mareka, kauhanyo yabu 10, ni—ni twenty- . . . kukalela ka timana yabu 21, Ni bata kubala. Halungeni timana yabu 17, nitaluse:

*Mi ha li mwa nzila ali a zamaye, mutu yomuñwi  
amatela ku yena, awa ka mañwele fa pila a hae, mi amu  
buza, ali, Muluti Yomunde, se Ni tokwa kueza ki nto  
mañi kuli Ni luwe bupilo bobusafeli?*

*Mi Jesu ali ku yena, Kiñi so ni bizeza yomunde?  
yomunde haayo konji, alimuñwi mi yani ki, Mulimu.*

*U ziba milao yeli, Usike wa buka, Usike wa bulaya,  
Usike wa uwza, Usike wa paka za buhata, Usike wa  
sinyeza mutu, Kuteka ndataho ni maho.*

*Mi yo amualaba ali, Muluti, zeo kaufela Ni li mamezi  
kuzwa kwa bwanana bwa ka.*

*Mi ki hali . . . Mi Jesu amu shalimile a mulata, mi ali  
ku yena, U sa tokwile kueza nto iliñwi: u ye, mi ulekise  
so luwile kaufela, mi, usife kwa babotana, mi ukaba ni  
bufumu kwa lihalimu: mi utahe, ulwale sifapahano sa  
hao, mi uni latelele.*

*Kono mutu yo autwa butuku ka manzwi ao, mi ayeleta  
aswabile hahulu: kakuli na sweli maluwo amatuna.*

Mi cwale Mulena aakeze limbuyoti kwa palo ya Linzwi la Hae.

<sup>15</sup> Cwale, luka bulela busihu bwa kacenu fa tuto. Ni bata kuli toho ya taba yaka ibe kuli “Ni Latelele,” mi tuto yaka: *Bueteleli*.

<sup>16</sup> Cwale ki zenca, kono Ni hupuzi kuli mwendi, kacenu mwa litapelo . . . Mi Ni bile fa nako yetelele hahulu, mi busihu ni busihu kuba fela fa mayemo a Liñusa le Ni nani, leo Mulena ani file kuli ni bulele ka lona. Ne ni hupula kuli busihu bwa kacenu, mwa kauhanyo yenca ye, Ni ka li talima ka mayemo asili. Mi li nako zeñata lu ambozi ka yona, ku ibiza, “Mucaha Ya Fumile.” Ni—ni bakutazi babañata mo, mizwale baka, hakuna kukakanya kuli ba italimezi mwa li nzila ze shutana. Mi Ni bata ku lika kuitalima mwa—mwa nzila ye shutana kufita mo Ni kile na ezeza, ye ya kuli *Bueteleli*.

<sup>17</sup> Se, muhupule se, kuli mañi ni mañi wa luna, banana ni ba bahulu, muhato wa mina wa pili wo mukile mwa ba ni ona mwa bupilo bwa mina, yomuñwi nana ni ku mi etelela. Yani ki niti. Mi

muhato wa mina wa mafelelezo o mukaba ni ona, yomuñwi uka tokwa ku mi eteleta. Yomuñwi ulukela kuetelela.

<sup>18</sup> Mulimu ulu swanisize kwa lingu. Mi haiba mutu kaufela wa ziba ka za kuta lingu ni sibupeho sa lingu, kiñi, mwa ziba kuli ngu haikoni kuifumana nzila ya ku kuta ka yona. I lukela kuetelelwa. Mane ni haiba mwa sibaka sa libulaelo, lu fumana kuli ba kenyanga lingu mwani mi kipeto ietelelwa ki puli. Ki puli ye eteletanga, mi ha ifita kwa mafelelezo a sibaka yatula mwateri, mi kipeto yona ikena mwahali mwa libulaelo. Kacwalo baka . . . Lu fumana kuli ngu haikoni ku fumana nzila ya ku kuta ka yona.

<sup>19</sup> Ni hupula nako yeñwi hane Nili ni yeñwi, nako iliñwi. Nenili mulisana wa limunananu mwa Indiana, mi Ne nili kwande mwa masimu; mi Na utwa nto yeñwi, mulilelo wa makeke hahulu. Mi neli—neli ngu, nei—nei latehezwi ki maa yona. Mi neisa koni ku fumana nzila ya kuya ku yona, mi ni ma yona na palelwa ku fumana nzila ya—ku ngunyana yona. Na to nanula ngu ya sesiñwi, mi mo ne ibezi ye kuzize ni ku ni yendamena. Ne niile ni zamaya cwalo, mazoho aka inza sweli ngu tuna ye. Inze ilila, mi—mi Na to iutwa. Mo ne isamesize toho ya yona yenyinyanifafasi ku ni yendamena mi neibonala kuli Ne—Ne—Ne ni ka itusa.

<sup>20</sup> Na hupula, “O Licwe la Myaha la Kale, lihaha la ka, u ni lwale mwa mazoho a Mulena Jesu, kuba fela ya itumela ka mo Ni zibela kuli Nika—Nika ya kwa Hae ku yo ba ni balatiwa baka.” Na hupula, “Kwa mafelelezo a musipili wa bupilo bwaka, u yo ni lwala fela mwa mazoho a Hao, Mulena, sina cwalo. Fo Ni ziba kuli Ni ka silela mwa buse bwa nuka cwale, kwani kwa neku leliñwi ko kusike kwaba kuswaba kamba matuku, ni lika zeñwi, mi Ni kaba ni balatiwa be Ni lata.”

<sup>21</sup> Mi haiba mubala ze tahile, kuna ni nto yetuna mwa pupo. Liki kaufela zeo Ni—zeo Ni talima teni, ni zeo Mulimu a bupile, Ki yena Mukalisi wa pupo. Pupo izamaya ka kuzwelapili. Pupo kamukana izamaya ka kuswana. Mulemuhe, liki kaufela . . . Sina ha Ni bulezzi, Na lumela manzibwana maabani, kuli “Pupo ipaka za Mulimu.” Kambe mwali kuba mube ni Bibele, niteñi ne mu ka talima ku ze bupilwe ni kuziba kuli Bibele ye ki Niti.

<sup>22</sup> Ni—Ni bile ni litohonolo la kuba kafa ni kafa mwa lifasi. Mi Ni balile likalulo ze shutana, mi Ni boni bulapeli bo bu shutana; ba Mohammedan, mi Ni balile Koran, ni—ni kubona ma Sikh, ba Jains, ni ba Mohammedan, ni ba Buddha, ni babañwi kaufela. Kono niteñi, yeñwi ni yeñwi ya zona, ina ni butali bwa zibo mi ni—ni—ni buka ya tuto ya litumelo ni buka ya milao, ni zeñwi cwalo. Kono Bibele ya luna kona ya Niti, mi Mulimu wa luna ki Yena fela ya lukile; kakuli yeñwi ni yeñwi ina ni kusupa kwa libita leliñwi kokuñwi koo mukalisi wa tumelo ya bona u sa lobesi, kono Bukreste busupeza kwa libita le li kwaluhile mi bu kona ku pila mwa Kubateni kwa Yena yana beilwe teni mwani.

Yena wa pila! Ha ki Mulimu *yana* liteni, Ki Mulimu *ya* liteni. Isiñi ya “*Na litenii*” kamba “*Ni kaba teni*,” kono “NI TENI.”

<sup>23</sup> Mi pupo kaufela izamaya ka kuzwelapili, sina ha Ni bulezzi, kuambola ka Linako za Likeleke zaluna (zeo luna ni libuka cwale ze bata kuzwa). Za...Ki kabakalañi hane Ni...ka za kuñola kwaka kwa Linako za Likeleke. Ni kamo lubonela Keleke, mo I hulezi, itahile fela ona cwalo sina pupo kaufela mo itahelanga.

<sup>24</sup> Mi ne lu sweli kuambola zazi leliñwi ka mo lizazi li pazulela kakusasana, ki mbututu yo munyinyani, ya fokola luli, yasina mata ku yena ni hanyinyani. Mi lizazi halunze li ya lipahama, wa tiya, ku tiya. Ka nako ya eiti kiloko wa kena sikolo, sina mushimani yomunyinyani kamba musizana yomunyinyani. Mi cwale ka ilebene kiloko kale a zwa kwa sikolo, mi kipeto uitukisa za—za musebezi. Mi kuya cwalo mwendi kufita ka sili kiloko kwa cinca, mwa bupilo bo bunca kukena mwa busupali. Mi kipeto wa shwa mwa musihali. Kana ani kona mafelelezo a lizazi njí? Batili. La kuta kakusasana habusa, ku to paka kuli ku nani bupilo, lifu, ku pumbeka, ni zuho. Mwabona? Mwabona?

<sup>25</sup> Lu talima likota, mo li zamaela ni se lieza. Ne nili mwa Kentucky nako yeñwi, Na—Na lata ku zumanga tumale, mi Ne niile kwani mwa nako ya litabula ku yo zuma tumale ni mulikana ka. Mi ki...ne ku omile luli.

<sup>26</sup> Mi kaufela ya kile a zuma tumale to tuseta, wa ziba butata bo buliteni fa ku nonga. Fani, ma—ma matali, ki mutoba hañwi fela, mi, oh, Houdini ki muswanisi ya picukanga tu—tu folofolo twani, mo tukona ku matela kwahule! Mi ni ku lika ku kunupa liito fa butelele bo bu likana ni liñokolwa ze mashumi a ketalizoho, mwa lizazi.

<sup>27</sup> Kacwalo, Bo Wood, mulikana ka, ya—ya bakile Paki ya Jehova, nali ni na. Mi luna... Ki hali, “Ni ziba simu yeñwi kwanu ko ku na ni muuna yana ni buñata bwa...” Kwani lu tubiza kuli, “tutaha.”

<sup>28</sup> Ki babakai baba ziba seo *kataha* kali sona? Kihande, ki siemba sifi sa Kentucky ko mu zwelela, kanti? Mwabona? Kanti nina kona ko Ni zwelela.

<sup>29</sup> Sina kwanu ku yeñwi ya libaka, ha ki kale hahulu; Ni lukela ku bulelela se Muzwale Williams ni babañwi, mizwale. Ne baize, “Luka yema cwale mi luopele pina ya naha—pina ya naha.”

<sup>30</sup> Mi se Nili, “*Ya kwa hae ku luna kwa Kentucky*.” Kacwalo hakuna ni yomukana ya na opezi ni na, kacwalo... Yani neli yona fela pina ya naha yene Ni ziba. Mi kacwalo ne—ne luli cwale...

<sup>31</sup> Ku lukile, sha. [Muzwale Branham utambekiwa ka pampili—Mu.J]: “Lwakupa u lapelele, kalibe mwahali mo onafa wa nokola.”

### Halu lapeleni:

<sup>32</sup> Mulimu Yomunde, Na ku Kupa, Mulena, Wena u—u Mufolisi yomutuna mi Ni kupa kuli muhau wa Hao ni sishemo liswale musala yomunde yo ona fa ni kutuhelisa mali ani. Kakuba sicaba se si lumela mi si kopani hamoho, kalibe utile kwetu ku to ikola Linzwi la Mulena ni kopano ya sicaba, mi Na ku Kupa, Mulena, ona fa cwale, kuli ukalimele sila ni kutuhelisa mali ani. Ka Libizo la Jesu Kreste. Amen. (Mi lwa lumela cwalo, lwa lumela cwalo.)

<sup>33</sup> Kuzwelapili ni likande nyana kuli lube fela ni maikuto lusika kena kale mwa butungi bwa ze ñozwi nyana ze Ni nani fa, ni Mañolo amañwi.

<sup>34</sup> Cwale na bulezi kuli, “Kihande, yena muuna muhulu yo, lukaya lu yo mu bona. Una ni tumale to tuñata hahulu mwa sibaka sa hae,” ki hali, “kono yena ha lumeli ku za bumulimu.” Ki hali, “Haiba . . . Nali fela bukaufi ni ku lu lwaha kambe ne lukaya kwani.”

<sup>35</sup> Se nili, “Kono haluna kuzwa ni kamale ni haiba kalikañwi kwetu. Lu se lubile mwa mafulo mo lisunda zepeli.” Mi ne luli ni masila, ni milelu kwa lifateho za luna kaufela.

<sup>36</sup> Mi ki hali, “Kihande?”

Se nili, “Haluyeni kwateni.”

<sup>37</sup> Kacwalo se luya limaili nyana, mwendi limaili ze mashumi amabeli. Ne se ni bile mwa naha yani haisali, ka masihu amalau, kwa mafulo a Methodist kone kuna ni lika zetuna zeo Mulena na ezize, ni sebelezo yetuna ya foliso mwahala sicaba sa ba Methodist. Mi cwale ki ha luya kwa buse bwa malundu amañwi kwa tumale ni mikomena. Mi mu lukela fela kuziba Kentucky fa kuziba kwani, mufuta wa sibaka one mu lukela kuba ku ona. Mi hane luilo punya kwa mulaho kwani lwa to punyeza kwa ndu cwana, mi teni ne ku inzi muuna muhulu, baana bahulu ba babeli, banze bainzi kwani ni likuwani za bona za kale zali ku kwahela kwa lipata za bona, mi—mi ki hali, “Ki yani fani,” yena ali, “ki ya tata.” Ali, “U toile linzwi lani la kuli ‘mukutazi,’” a bulela.

<sup>38</sup> Kacwalo se Nili, “Kihande, kuli Ni ine fela mwa mota, kamba lusika lwa yo zuma ni hanyinyani.” Se nili, “Kena uyo mu kupa haiba lwa kona ku zuma.”

<sup>39</sup> Kacwalo atuluka mi akala ku zamaya kukena mwani, abulela ku bona. Mi mwa Kentucky, kamita, mwa ziba, ki “a mukene,” ni zeñwi cwalo. Mi kacwalo aya kwani mi ali, “Ni kupa kuli hani zibi haiba lwa kona ku zuma fa nako nyana mwa sibaka sa mina.”

<sup>40</sup> Muuna muhulu ali ku ina fani, mwendi wa lilimo ze sebente-faifi za kupepwa, kwai inze ingonga mwa mulomo wa hae, ki hali . . . aikwa, mi ali, “Ki wena mañi libizo?”

Yena ali, "Libizo la ka kina Wood."

Mi ali, "Kana u muhabo muuna muhulu Jim yana pilanga kwa..."

Yena ali, "Eeni, Na ni mushimani wa bo Jim." Ali, "Kina Banks. Eeni."

<sup>41</sup> "Kihande," yena ali, "muuna muhulu Jim neli muuna ya sephala." Ali, "Kaniti, kena uiponele." Ki hali—ali, "Kikuli uzamaya unosi fela?"

Mi ali, "Batili, mulisana waka uinzi fande fani."

Mi ali, "Sikamañi?"

Ki ali, "Mulisana ka uinzi kwande mwa mota," ali, "utilo zuma ni na."

<sup>42</sup> Yena ali, "Wood, utalusa kuli sooli ya kwatasi hahulu kufitela ulukela kuba ya hohololwa ki mukutazi kaufela ko uya?"

<sup>43</sup> Kacwalo u buhali, mucembele wa teni, kacwalo Na hupula kuli kuhande Ni tuluke fela ni zwe mwa mota, mwa ziba. Kacwalo Na tuluka ni ku zamaya zamaya, mi yena ali, "Kihande, ki wena mukutazi, huh?"

<sup>44</sup> Se nili, "Eeni, sha." A ni talima kukala kwa toho kuisa kwa mautu; nitezi mali a tumale, ni masila. Ki hali—ki hali... Se nili, "Hani bonahali sina ya cwalo."

<sup>45</sup> Yena ali, "Kihande, Ni mufuta wa ya ya cwalo." Yena ali, "Wa ziba, Ni bata kuku bulelela sesiñwi." Ki hali, "Ni lukela kuba ya sa lumeli za bumulimu!"

<sup>46</sup> Se nili, "Eeni, sha, Ne ni utwisisa sani." Se nili, "Hani sepi kuli ki lika za kuikuhumusa ka zona, niteñi. Wena boo?"

<sup>47</sup> Mi ki hali, "Kihande," yena ali, "Ha ni zibi." Mi ali, "Ni ka ku bulelela se Ni nahana ka mina mitangana."

Se nili, "Ku lukile."

<sup>48</sup> Ki hali, "Usweli kuhuhula kwa kota isili." Mi ki babakai baba ziba seo sani sitalusa? Mwabona? Sitalusa kuli ki njia ye puma ka buhata, mwa bona; kamale ha kayo kwani ni hanyinyani, mwabona. Ki hali, "Usweli kuhuhula kwa kota isili."

Se nili, "Sani ki munahano wa hao."

<sup>49</sup> Mi yena ali, "Kihande," ki hali, "talima, wa bona mupaipi wa musi o yemi fani wani nji?"

"Eeni."

<sup>50</sup> "Ne ni pepezwi kwani, lilimo ze sebente-faifi kwa mulaho." Mi ali, "Ni pilile ona mwa malundu a kwanu, sibaka se kaufela, ka lilimo ze kaufela." Mi ali, "Ni talimanga mwa mbyumbyulu, Ni talimile kafa ni kafa, mi, kaniti, mwahala lilimo ze sebente-

faifi ze kamukana, kuli Ni ka bona sika se si bonahala sina Mulimu. Kikuli ukile wa nahana cwalo?"

<sup>51</sup> Se nili, "Kihande, kuitingile ku so talima, mwabona, kamba so bata ku bona."

<sup>52</sup> Mi yena ali, "Kihande," ki hali, "Na—Na kaniti hani lumeli kuli kuna ni sibupiwa se si cwalo. Mi Ni lumela kuli mina balikani muyanga fela kwande ka bunolo ku yo uwenza sicaba masheleni a sona ni lika zeñwi kaufela. Mi ona cwalo kipeto za iconga."

<sup>53</sup> Se nili, "Kihande, wena u mu American, una ni tukelo kwa—kwa munahano wa hao."

<sup>54</sup> Ki hali, "Kuna ni mushimani alimuñwi, nako yeñwi, yene Ni utwile," na ize kuli, "kuli Na kaniti ne ni ka... Haiba yena... Kambe Ne ni ka kona kuambola ni mucaha yani," ali "Ni tabelia ku—ku mu buza lipuzo nyana."

Se nili, "Eeni, sha."

<sup>55</sup> Ki hali, "Ne li mukutazi, hakulata wa kona ku mu ziba." Ali, "Na na ni mukopano kwani mwa Campbellsville, ha ki kale hahulu, mwa patelo ya keleke kwani, sibaka sa mafulo." Mi ki hali, "Ni libezi libizo la hae." Ali, "Uzwa kwa Indiana."

Mi—mi Se nili, "Oh? Eeni, sha."

<sup>56</sup> Mi Muzwale Wood akala kubulela kuli, "Kihande, Ni..." ("Usike wa bulela cwalo.") Mi ki hali...

Se nili, "Ku cwani ka yena?"

<sup>57</sup> Ki hali, "Kihande," mi ali, "musala muhulu..." (yomuñwi) "fahalimwa lilundu lani..." Ali, "Wa ziba, na shwa bakeñisa kansa." Mi ali, "Musala ka ni Na ne lu yanga teni kakusasana kuyo—kuyo cinca mumbeta wa hae" Ali, "Mane ne ba sa mu nanulangi hahulu mwa halimu kuli ba mu lobaze fa mumbeta," ali, "ne ba hohanga fela shiti ya kuapala." Mi ali, "Na sweli ku shwa. Na sa bile kwa Louisville, mi ali baalafi ne ba mu palezwi mi bali na 'ka i shwela.'

<sup>58</sup> "Mi kezela hae aya kwa mukopano wani, mi ali, 'Mukutazi yani na yemi kwa pata kwa katala, inza talimisize mukokoto wa hae kwa sicaba mi abiza musala yani fa libizo, ni ku mu bulelela, "Hana zwile, acomola kataulo ni ku ka beya mwa—mwa kakotana nyana ka hae." Mi abiza libizo la musali yo kwani, limaili ze mashumi amabeli kwatasi kwanu, ni kubulela mwa na nyandisezwa ki kansa, seo libizo la hae nelili sona, ni lika kaufela za na bile ku zona; ali, "Inga kataulo kao mi u yo ka apesa musali yani," mi abulela kuli "musali yani uka foliswa kwa kansa ya hae.'"

<sup>59</sup> Mi ali, "Ne ba tile kwanu busihu bwani." Ali, "Kaniti, Ne ni utwile muhuwelo o sabisa hahulu fahalimu fani. Na nahana kuli ne ba inzi ni ba Salvation Army bene ba tile fahalimwa lilundu

fani. Ali, ‘Kihande,’ Se nili, ‘Ni sepa kuli kezeli ya hulile kale ashwa.’ Ali, ‘Lu ka... Kamuso lu ka yo shimba kocikala, mi lu ka mu zusa mwani ku muisa kwa mukwakwa wo mutuna,’ mi ali, ‘kacwalo ne ba ka muisa ku muzamaisi wa maswabi.’ Mi ki hali... Se lu libelela. Ne kusina tuso ya kuya kwateni mwa nako ya busihu bwani.” Ali, “Ki butelete bo bu kona ku likana maili fa ku kambama lilundu le kwanu.” Ali, “Ki ha luya teni kakusasana habusa, mi wa ziba sene si ezahalile?”

Se nili, “Batili, sha.”

<sup>60</sup> Ki hali, “Na inzi fani inza ca nama ya ku halika, ni kunwaa tii ya kofi, ni muuna hae.”

Se nili, “Utalusa ona cwalo?”

Ki hali, “Eeni, sha.”

“Oh!” Se nili. “Cwale, mukutazi, wena luli ha utalusi cwalo.”

<sup>61</sup> Ki hali, “Se si ni bilaeza ki sa kuli... kana muuna yani, na konile cwani mi a si kaba kale mwa naha ye, mi azibe zani.” Mwabona?

Mi se Nili, “Oh, ha u lumela cwalo.”

Ki hali, “Kona niti.”

Se nili, “Wa lumela cwalo?” Mwabona?

<sup>62</sup> Ki—ki hali, “Kihande, kambama lilundu lani, Ni ka ku bonisa cwalo.” Uswelii wa ni kutaza fa cwale, mwa bona.

<sup>63</sup> Kacwalo Na—Na li, “Um—um.” Na kayula apule, mi—mi se Nili, “Na kona ku shimba iliñwi ya ma apule aa njii?” Mi Na ipukuta fa liapalo za ka.

<sup>64</sup> Ki hali, “Kihande, likokwa ze ñandatalukeke kona ze aca, Na sepa wa kona ku kaula iliñwi.” Mi he... Mi cwale se Nili, “Kihande,...” Na—Na i monkola... hanyinyani, mi se Nili, “Ye ki apule yende.”

<sup>65</sup> Ki hali, “Oh, eeni.” Ali, “Kana wa ziba kuli kiñi? Ne ni cezi kota tani fani, oh, lilimo ze mashumi amane kwa mulaho, kamba zeñwi ze cwalo.”

Se nili, “Oh, kana ki niti yeo?”

“Eeni, sha.”

<sup>66</sup> Se nili, “Kihande, mi silimo ni silimo...” Se nili, “Ni lemuha kuli halu sika ba kale ni kuanda kwa silami, isali makalelo a kweli ya Muyana.” Mi se Nili, “Matali ani asweli abulumuka kwa likota.”

<sup>67</sup> “Eeni, sha. Yani ki niti, sekutaha litabula cwale. Ni lumela kuli lu kaba ni litabula kapili nako ye.”

<sup>68</sup> Se nili, “Eeni, sha.” Na cinca taba, mwabona. Mi ki hali... Se nili, “Kihande, mwa ziba, ki ze nca,” Se nili, “mezi a mwa kota ani mwa zamaelanga mwa kota.” Se nili, “Ni matali ani

mwa welanga kwateni, mi niteñi hakuna . . . neba—neba si kaba ni silami sa maliha kuli siomise matali.”

<sup>69</sup> Mi ki ali, “Kihande,” ki hali, “kana seo si na ni ku eza sikamañi ku ze lu bulela?”

<sup>70</sup> Mi se Nili, “Kihande, Na—Na komoka fela.” (Mwa ziba, boma kamita ne ba bulelanga kuli, “Mufe komu muhala omutuna luli mi kipeto ika itamelela ili yona, mwa ziba.”) Kacwalo Ne ni mufile fela muhala o mutuna.)

<sup>71</sup> Kacwalo ki ha zwelapili, mi ali, “Kihande, eeni, sani si na ni sikamañi ka sona?”

<sup>72</sup> Se nili, “Mwa ziba, Mulimu ki yena ya tisanga ma apule ani, mi kipeto mwa ikola ma apule ani ni matali, mi kipeto muina mwa—mwa muluti ni zeñwi cwalo. Za ya mwa litabula la silimo mi,” Se nili, “za kuta hape ni ma apule ni matali hape.”

<sup>73</sup> Mi ki hali, “Oh, yani ki pupo fela. Mwabona, yani ki pupo fela.”

<sup>74</sup> Se nili, “Kihande, ka niti, yani ki pupo.” Se nili, “Yani ki pupo, kono Yomuñwi ulukela ku zamaisa pupo.” Mwabona, Na . . . ki hali . . . “U ni bulelele cwale se si eza cwalo?”

<sup>75</sup> Mi ki hali, “Kihande, fela ki—fela ki pupo ka buino bwa teni.”

<sup>76</sup> Se nili, “Ki mañi ya bulelela litali lani cwale, mi ka za . . . ?” Se nili, “Cwale, libaka leo litali lani liwanga kwani, kakuli mezi a mununo wa kota akenanga mwa mibisi. Mi ku cwani haiba mezi a mununo wa kota ani akona kuinelela fela mwa kota mwa nako ya maliha? Ki sikamañi sene si ka ezahala?”

<sup>77</sup> Ali, “Na ka bulaya kota.”

<sup>78</sup> “Kihande,” Se nili, “cwale, ki butali mañi bo bu shetumuna mununo wa mwa kota wani kukena mwa mibisi, ali, ‘Zwa fa cwale, seli nako ya litabula, kukena mwa mibisi ku yo i pata?’ Ni ku ina mwatasi mwa mibisi inge mwa libita; mi kipeto litabula lelitatama la taha hape, ili kutisa ma apule amañata, ni kutisa matali amañata hahulu ni lika zeñwi.”

<sup>79</sup> Ki hali, “Yani ki pupo fela, yekona ku eza cwalo.” Ali, “Moya o fuka! Ka za licinceho, mwa ziba, kutaha litabula.”

<sup>80</sup> Se nili, “Toma buleke bwa mezi fa lisina fani, mi mubone haiba pupo ika a kalisa kuisa kwatasi a buleke ni ku akutisa hape. Mwabona?” Mwabona?

“Kihande,” ki hali, “wa kona kuna sesiñwi.”

Se nili, “Unahane cwalo ha luya kwa ku zuma.”

Mi ki hali, “Kihande,” mi abulela kuli, “muzume ko mu bata kaufela.”

<sup>81</sup> Mi se Nili, “Ha Ni ka yo kuta, haiba uka ni bulelela butali bo bu zamaisa mezi a mununo wa kota ani ku yo punya ni kwa

mibisi, ku ina mwa nako ya maliha kaufela ku yofita kwa maliha a tatama, Ni ka ku bulelela Butali bo ne bu ni bulelezi ka za musali yale fa halimu fani.”

Ali, “Ku ku bulelela?”

Se nili, “Eeni, sha.”

Yena ali, “Ha ki wena mukutazi!”

Se nili, “Kikuli wa kona kuziba libizo la hae?”

Ali, “Eeni.”

Se nili, “Branham?”

Ki hali, “Ki yena yo.”

Se nili, “Yani—yani ki niti.” Mwabona?

<sup>82</sup> Mi kana mwa ziba nji? Ne ni etelezi muuna yani ku Kreste, ona fani fa bupaki bwa hae luli.

<sup>83</sup> Mi silimo kasamulaho hane Ni li kwani na hoha mota (mutelo wa Indiana ku yona) mwa patelo. Ne ba se ba tutezi kusili, na sa shwile. Mi kaewalo ha Ni ka yo kuta, ne ku yemi musala hae kuli ani omanye; Na hupula Ne ni na ni tumelelo ya ku zuma. Mi ki ha zwa kwani, ki hali, “Kana ha u koni kubala?”

<sup>84</sup> Se nili, “Eeni, ima.”

Ki hali, “Kana uboni litaku ze ñozwi kuli ‘Hakuna Kuzuma!?’”

<sup>85</sup> Se nili, “Eeni, ima, kono,” Se nili, “Ni—Ni nani tumelelo.”

<sup>86</sup> “Ha una tumelelo!” a bulela. Mi ali, “Ne lu lekile sibaka—sibaka se fa lilimo zeñata.”

<sup>87</sup> Se nili, “Kihande, kezeli, Ni—Ni fosize kanti, Muni swalele.”

<sup>88</sup> Mi ali, “Uswabele noto! Mitelo ya kwa Indiana yani i beilwe fani, ni kubeiwa fateni, mina mu sicaba se si nani bundume!”

Se nili, “Kana Na kona ku itatulula nyana?” Se nili . . .

Musali ali, “Ki mañi ya kufile tumelelo?”

<sup>89</sup> Se nili, “Hani zibi fela . . .” Se nili, “Neli muuna muhulu yana inzi fande fani, hane Ni li kwanu ñohola, mi ne lu sweli ku ambola ka za Mulimu.” Mwabona?

Mi a talima, ki hali, “Ki wena Muzwale Branham nji?”

Mi se Nili, “Eeni, ima.”

<sup>90</sup> Ki hali, “Ni swalele. Ne ni sa zibi yo nooli yena.” Ki hali, “Ni bata kuku bulelela bupaki bwa hae. Lihola za hae za mafelelezo za ku shwa kwa hae, a nanula mazoho a hae ni ku lumba Mulimu.” Ali, “Na shwezi mwa tumelo ya Sikreste, mi na isizwe ku Mulimu.” Mwabona?

<sup>91</sup> “Haiba ba bakuza, macwe kapili aka huwaka.” Kuna ni sesiñwi mwa lika ze bupilwe.

<sup>92</sup> Mutualime linyunywani, mutualime lifolofolo, mutualime lika kaufela, mi mutualime ni ze bupilwe.

<sup>93</sup> Mutualime kankwilimba kaka nyinyani mo ka fufela. Ki nyunywani ye shutana cwani, mwabona. Haina—haina nyoko ni iliñwi, haikoni kuca sina mo li kona kucela liñwalala. Mwabona? Haina nyoko ku yona. Hailukeli kutapa mwa—mwa—mwa mezi, kakuli ina ni sesiñwi mwahali ku yona; sa ikenisa kukalela mwahali kuya kwande, mwa bona.

<sup>94</sup> Yani kona nzila ya Sikreste mo iinezi. Yani kona nzila yeo Mulimu na italusa ili Yena, mwa—mwa—mwa nkwilimba. Mwabona, kakuli...mi ni...Jesu na yemelwa ki Ngunyana. Kamita mwa lika ze bupilwe mu ka fumana Mulimu. Mi Mulimu ulu swanisisa kwa lingu ze na ni ku eteletwa. Kana mukile mwa lemuha fani, Ne ni kutilizwe sebelezo ka yona nako yeñwi ya kale? Kuli Nkwilimba ne ishetumuka fa halimwa Ngunyana, ku eteleta Ngunyana, mi Ya I eteleta kuya kwa libulaelo. Yona—yona—yona Nkwilimba! Cwale, kambe Ngunyana... Nkwilimba yani ne isike kulula fa halimwa mufuta wa folofolo kaufela, kakuli sibeli sa zona ne li lukela kuba za sibupeho se si swana. Mwabona? Kambe Nkwilimba ne ika lula fa halimwa sitongwani, kambe ne si ka honela kamba kubopa, kipeto Nkwilimba kambe be I ka fufa.

<sup>95</sup> Kihande, yani kona nzila ye swana cwale. Ni linzila za luna ze maswe, kipeto Moya o Kenile Wa ikelanga fela ku fufela kusili. U lukela kuba ni sibupeho se si swana. Nyunywani ya Lihalimu, yona nkwilimba; folofolo ye ishuwile kufitisisa mwa lifasi, yona nkwilimba; za kona ku lumelelana hamoho. Mi cwale Moya o Kenile ha utaha fa halimwa luna ni ku lu eza libupiwa zenza, kona kuli Wa kona ku lu zamaisa. Kono halu lika kupila bupilo bo bu swana bwa kale, habuna kubeleka! Habuna kubeleka fela.

<sup>96</sup> Cwale, muhato wa pili o mukile mwa ba ni ona mwa bupilo bwa mina, kubulela ka bueteleli, kaniti neli fa mazoho a *me* ya musa. Mazoho ani akona kukuza busihu bwa kacenu, kwande kwani mwa libita leliñwi, kono lani neli lizoho le ne li mi sweli fa kuba ni kuhata kwa mina kwa makalelo.

<sup>97</sup> Mi kasamulaho wa bo maa mina ku mi luta ku zamaya, mi ne mukona kutambuka mitambo nyana ni kuwela fafasi, ni ku nanuha, mi ne mu hupula kuli mueza lika zetuna, kutuha foo ba ku isa ku *muluti wa sikolo*. Mi he akala ku kuetelela kukena mwa tuto; ka mwa ku ezeza ni sa ku eza, ni mo lukela kuitutela, ni—ni zeñwi ze cwalo.

<sup>98</sup> Mi kasamulaho wa muluti wa kwa sikolo afeza ni wena, ki ha ukuta, bo *ndataho* ba ku kwaaula. Mi kasamulaho bo ndataho hane ba ku sweli, ne ba ku lutile mwendi za pisinisi ya hao; mwa kubela muuna wa pisinisi ya ziba hande, mwa ku ezeza lika ka swanelo. Bo maho ba ku luta mwa kubela mufumahali—mufumahali wa mwa lapa, mwa ku tatehela, ni zeñwi cwalo.

<sup>99</sup> Mi cwale hane batilo feza ni wena, kipeto *mukutazi* kamba *muprisita* a ku pakata.

<sup>100</sup> Kono *cwale* ki mañi ya ku zamaisa? Yani kona puzo cwale. Cwale, luna kaufela lu zamaiswa ki sesiñwi busihu bwa kacenu. Lu lukela kuba cwalo. Lwa eteletwa. Mulemuhe!

<sup>101</sup> Cwale halu talimeni ku za mucaha yoo...sene si mu susumeza. Halu talimeni ka za...yena mucaha wa pisinisi yo mo ne lu ka mu bizeza, kakuli nali mutu wa pisinisi. Nali mutu yomutuna yana kondisa za hae. Halu talimeni kwa bueteleli ba hae.

<sup>102</sup> Mwendi, pili, bomahe ne ba mu lutive asali mushimani yomunyinyani lika za na lukela ku eza. Bo ndatahe ne ba mu ezize kuba ya zwezipili, mi mwendi mane ni haiba ku mu siyela—ku mu siyela liliwo, kakuli ne bali babusisi bona kasibili; mwendi bo ndatahe ne se ba ikezi, kacwalo nali muuna wa—wa pisinisi. Na li wa...Halu mu bizeni kuli, kacenu, sina muuna wa pisinisi ya Sikreste; kamba, nali muuna wa pisinisi ya bulapeli, Na sepa i kona kuba mubulelelo o munde.

<sup>103</sup> Muuna yo neli wa bulapeli, na si ya sa zibi bumulimu. Mi na lutilwe ki bomahe mwa ku ezeza lika ka swanelo, mwa ku zamaela, mwa ku itiniseza litino. Na lutilwe ki bo ndatahe, muuna yomutuna wa pisinisi, ni mwa kubela mutu ya zwezipili mwa lika; mi pisinisi ya hae ne i kondile. Mi bo ndatahe ni bomahe ne ba hulezi mwa keleke, mi ne ba mu supelize ku *muprisita*. Mi *muprisita* na mu ezize kuba muuna wa bulapeli. Kabakaleo nali muuna yana ziba sizo hande, nali mushimani yomunde wa maoyo.

<sup>104</sup> Haiba nji Jesu Kreste ha na mu talimile a mu lata, neku na ni sesiñwi se ne sili sa niti ka mushimani yo. Luli. Kakuli Bibele i bulezi fa kuli, lu fumana cwana mwa Mareka, “Mi Jesu ha mu talimile, a mulata.” Eeni, “Jesu ha mu talimile, a mulata.” Kacwalo he ku lukela kuba sesiñwi sa luli ka za mitangana yo. Na li ya...nana ni buino bo bunde, mi ni buino bo bunde ha bu bapiswa ku babañwi. Nali muuna yana hulisizwe hande; ya talifile, ya butali, ya ipitezi, ya na kondisa za pisinisi ya hae, mi nali muuna wa bulapeli. Na nani buino bo bunde bo ne bu ipitezi, kuli mane na hohile kutwisiso ya Jesu Kreste Mupulusi. Kono cwale ha na swabisizwe, kakuba ya kondisa mwa lika zeñwi...

<sup>105</sup> Neku sina se ne si fosahalile; kaniti na li mwana zwezi, na yemi hande, ya talifile, ni tuto yende, kupunuha kwa hae, nali ya butali, muuna wa pisinisi yomunde, kaniti na li wa sikhata sa baana ba pisinisi kokuñwi mwa Palestine. Hakulata neli wa katengo ka baana ba pisinisi sina mo lubezi ni kona busihu bwa kacenu, hakuna kukakanya nali ya cwalo, kakuli muuna wa pisinisi kamita una ni tutengo twa kutwano ni babañwi, yomuñwi ni yomuñwi.

<sup>106</sup> Kakuli kuswana fela sina “linyunywani za mafufa,” lina ni lika za kuambola ka zona. Mi haiba yo... Baana ba bulapeli, haba lati kubulela ka muuna ya beleka kwa sibaka sa manwelo a bucwala ni... kaufela bona hamoho, kakuli habana sika se si swana. Lu lukela kuba ni lika ze swana. Kacwalo Bakreste bana ni lika ze swana ni Bakreste; baezalibi bana ni lika ze swana ni—ni baezalibi; mi—mi tutengo, ni seo kaufela bali sona, bana ni lika ze swana. Mi mushimani yo kaniti neli wa—wa katengo ka baana ba pisinisi.

<sup>107</sup> Mi nali wa bulapeli mwana kona kubela, kakuli Jesu na mu buzize fa, mi ali, “Ni bulukile litaelo ze, ni li mamezi kuzwa kwa bwanana bwa ka.” Yani ki niti.

<sup>108</sup> Mwabona, na hulisizwe hande nde, ku lutiwa hande, ni lika kaufela. Kono ha na swabisizwe ka za—za ku nahana fa Bupilo Bobusafeli... Cwale Ni bata kuli mulemuhe, ka buino bwa hae bwana nani, na zibile kale na si na Bupilo Bobusafeli.

<sup>109</sup> Cwale, tutengo twa luna kaufela, keleke ya luna, bu membala bwa luna ni lika zeñwi ze lu talima kuba zende hahulu, tutengo twa luna twa si American, ni lika kaufela, ki zende luli, hakuna sika sa kubulela bumaswe ka sona. Mi katengo ka luna ka Baana ba Pisinisi ya Sikreste kwanu, ki taba yetuna, ibile munyako o kwaluhezi ku na kuli... ka mihipulo ya likopano za kuli “lu Bakreste.”

<sup>110</sup> Hakuna ni yeñwi (ya likopano) ye kona ku ipapata luna, Mukreste wa niti, kakuli mu ba siemba sa Mulimu. Likopano ki za ipangezi mutu, mi Bukreste bu zwa kwa Lihalimu. Kono mwa lika ze kaufela ze lu nani, ka bunde mo ba inezi, ka bunde halunze lu taha hamoho, mi ni ka bunde bwa mikopano ye lu nani, ni mayemo a kwa sicaba e luna ni ona, ibo mañi ni mañi wa luna lu talimani ni *Bupilo Bobusafeli*. Mi hakuna taba ka mo lu bezi baba punyuhile mwa pisinisi, ka mo lu bezi baba kondisize, mi ma membala babatuna bao luli bona, ni mo lu belekela, mo lu likela kuezeza lika hande, niteñi, haiba ha li ezahali ka nzila ye lukile, ki milapelo ya Mulimu mwa mbango.

<sup>111</sup> Jesu na tomahanyize sani ka mukwa o swana, sina ha Ni yema fa ka nako nyana. Na ize kuli, “Mu Ni lapela mwa mbango, ku luta sicaba litaelo za batu.” Cwale munahane! Milapelo ye sepahala, wa luli (ka busepahali bwa pilu ya hao) ku Mulimu, kono niteñi ibe za mbango! Ne ku kalile ona cwalo ku Kaine, kwa simu ya Edeni. Milapelo ye sepahala, kono ne ihanilwe! Ya bulapeli luli, niteñi a haniwa!

<sup>112</sup> Mwa Shreveport sunda yefelile, sunda ya mwa mulaho yaale, kwa mukopano wa Baana ba Pisinisi, kwa mukushuko kwani kone kuna ni mianda anda ya batu bene ba kopani, Ne ni ngile lihola zepeli ni licika kubulela ka za: *Kuezeza Mulimu Sebelezo Kusina Kuba Tato Ya Mulimu*. Cwale, sani si utwahala bunca, kono lu lukela ku ipeya luna bañi mwa muzamao wa lukisize

Mulimu ili yona nzila ya kueza lika ka yona. Hakuna taba ka mo lu nahanelu kuli li lukile, li lukela kuba ka Linzwi la Mulena ku si cwalo ki za mbango. Kaine na lapela, kono ne si kuya ka Linzwi la Mulena. Bafarisi ne ba lapela, kono isi ka Linzwi la Mulena. Mi ni mwa liñusa leliswana le kwa Baana ba Pisinisi, Ne ni lutive cwalo.

<sup>113</sup> Davida, na bata ku ezeza Mulena sebelezo, mi na lukile ku sa na bulezi. Na bulezi kuli, “Kana ki swanelo kuli areka ya Mulena kuli ibe kwa neku lani? Halu yo itiseni kwanu.” Mwa mazazi a mulena, mulena yomuñwi ya na yolile. Na ize kuli, “Ha ki swanelo. Ne ba si ka buza Mulena ka za areka, kono lu lukela kueza cwalo.” Cwale, yani kona swanelo, se ne ba lukela kueza. Ki hali, “Lu swanezi ku yonga areka, mi lwa kona ku buza Mulena.” Mi yani ki niti, ne ili kwani kwa naha isili. Ali, “Lu lukela kuitisa kwanu. Lu yo itisa kwanu lu ibeye mwa ndu ya luna mo, mi lu lapele Mulena.”

<sup>114</sup> Cwale mulemuhe naile ka muzamao o fosahalile ka kueza cwalo. Na buzize bo kapitao ba limpi za masole baba mashumi a ketalizoho ni ba ze mianda ni ze likiti. Kaufela bona ne ba buzizwe, mañi ni mañi. Ka kubona kuli neli tato ya Mulena, mo ne ku bonahalela, kamba neli—neli Linzwi la Mulena.

<sup>115</sup> Linzwi la Mulena, fokuñwi, mu lukela ku Li beya mwa sibaka sa Lona se si lukile ku si cwalo ha ki Tato ya Mulena. Mwabona? Cwale seo si nwеле mi kipeto mu ka ba—ba ni maikuto a bunolo ku seo Ni lika kubulela.

<sup>116</sup> Hanilati kuli keleke ikena mwa mihato yene mufumani kwani mwa England: milili ye mitelele, ni baana baba pentile lifateho za bona, ni kulyangana. Ha lulati zani! Hakuna taba ka mo liut wahalela kuba za bulapeli, ni buñata bwa lipina za Elvis Presley za bulapeli, isali diabulosi. Mi ha Ni muatuli, kono “Ka miselo ya bona mu ka ba ziba.” Mwabona? Yena ki wa Pentekota, kono sani ha si pangì shutano ni yekana. Mwabona, miselo ya hao i paka seo uli sona.

<sup>117</sup> Hakuna taba kamba Moya wa tuluka ku yena, wa kona kubulela ka malimi, wa kona kuhuwa, wa kona kufolisa ba kuli, mi Jesu naize, “Babañata ba ku bona ba ka taha ku Na mwa lizazi lani, mi bakali, ‘Mulena, kana ha Ni sika eza se ni sanii?’ Mi Ni kali, ‘Muzwe ku Na, mina baba sebeza ze maswe, Nali kuba ni mi zibe.’” Mwabona?

<sup>118</sup> Lu lukela kuba baba sephala, Bakreste ba luli, mi nzila fela yelukona kueza sani ki ha lu talimana ni puzo yeliteni fa ya kuli “Bupilo Bobusafeli.”

<sup>119</sup> Kuna ni fela mufuta ulimuñwi wa Bupilo Bobusafeli, mi bwani bu zwa ku Mulimu. Mi Na tomile kale kuba sibupiwa kaufela sene si ka Bu amuhela. Kuswana fela sina hane muli kokwani ya bupilo ku bo ndata mina, ne muli kokwani ya bupilo ku Mulimu; yeñwi ya milelo ya Hae ka kukala, ku si cwalo

hamuna kuba Kwani. Ne mu tahile kuzwa mwa linoka za bo maa mina; bo ndata mina ne ba sa mi zibi, ne muli mwa liteka za bo ndata mina. Mi cwale hane mutile mwa linoka za bo maa mina, kona fo ne mutilo bela batu baba pila mi mu bupilwe mwa siswaniso sa bo ndata mina, cwale mwa kona kuba ni kuikambota ni yena. Mi ki taba ye swana ni Mulimu, haiba muna ni Bupilo Bobusafeli.

<sup>120</sup> Bupilo bone mutile ku bona, ona bupilo bwa butu, bupilo bwa nama, bwani neli bwa bo ndata mina. Mi nzila fela inosi ye mu kona kutaha ka yona ki kupepwa sinca, kona fela nzila inosi, kikuli bu lukela kuzwa ku Ndate wa Lihalimu, maikuto a Hae. “Bona bao Ndate a Ni file baka taha ku Na kaufela.” Mwabona?

<sup>121</sup> Muteni mo kakuli libizo la mina ne li ñozwi mwa Buka ya Ngunyana ya Bupilo mane ku si kaba ni mutomo wa lifasi. Yani ki niti luli. Mu peu ye pila, peu ya moyo yezwa ku Ndate wa Lihalimu, siemba sa Linzwi la Mulimu. Sani si be cwalo, sina ha Ni bulezi, kona kuli ne muli ni Jesu fani ha Nali fa kakuli Na li *yena* Linzwi: ne mu nyandile ni Yena, ku shwa ni Yena, kupumbekwa ni Yena, ni kuzuha ni Yena, mi cwale muinzi mwa libaka za Mahalimu *ku* Yena!

<sup>122</sup> Mulemuhe, Davida na hupula kuli lika kaufela ne lili hande, mi ki ha buza sicaba kaufela, mi kaufela bona ba kala kubina ni ku tabela ni kuhuwa. Ne ba nani maikuto abona kaufela a bulapeli nana li teni, kono niteñi ne si tato ya Mulimu kuli ba shetumuke ku yotisa Linzwi la Mulimu kukutela mwa ndu ya Mulimu. Kono, mwa bona, Mulimu kamita (mwa masika kaufela) ubelekanga ka nzila iliñwi. Mulelo wa Hae wa pili kona mulelo wa Hae unosi fela, kakuli Yena u petehile mwa milelo ya Hae. A ezangi sika konji pili A si patulule kwa batanga ba Hae, bona bapolofita. Yani ki niti.

<sup>123</sup> Ki kabakaleo lo, lusika kwa keleke ye lu pila ku yona, hakuna keleke, hakuna Methodist, Baptist, ma Pentekota, kamba sika sesiñwi kaufela, se si kona ku beya Keleke ye ku Munyaliwa. I lukela kuba kalabo ya Malaki 4, kuli Mulimu alume mupolofita kuli ato patululwa ku lona, kakuli yani kona nzila fela inosi. Likeleke za luna za iconga konga ni ku nepela taba ya teni mwa sikuwata, sina fela mo ku belanga kamita, mi Mulimu kamita wa lumanga bapolofita.

<sup>124</sup> Mi neku yemi Natani mwa naха, mupolofita yana pakwa fa pila Mulimu, mi mane ne ba si ka mu buza ka maikuto a hae.

<sup>125</sup> Mi ba ya kwani ni ku yo zieza bupilo bwa mutu yasina mulatu, ni zeñwi cwalo, mi ba lwala areka. Kufita kuli ba ibeye fa maheta a Malivi, kuli ba i lwale, ba i beya mwa kocikala kuli i ilwale. Kaufela zona kulyangana!

<sup>126</sup> Mwa bona, haiba musayi ka—ka tato ya Mulimu, ni ka nzila yeo Mulimu a lufile kuya ka yona, kamita baka I lyanganisanga ni ku I talima ka buino bwa katengo kakañwi,

kopano, liñusa leliñwi, mi kipeto mwa ikela. Mwabona? Kamita kubile ona cwalo.

<sup>127</sup> Yani kona taba yeswana ya na talimani ni yona mushimani yo. Na tile; na bile kale—kale—kale membala mwendi wa Bafarisi kamba Basaduki, kamba sikuwata tuna sesiñwi sa lizazi lani. Nali wa bulapeli mwa na kona kubela. Ki hali, “Ni mamezi litaelo ze Ni lutilwe, kukala hane Ni sali mwanana.” Mwabona? Mi Jesu a mulata ka zona. Kono ahana ku zamaiswa, na hanile ku amuhela bueteleli bwa niti bwa Jesu Kreste kuli amufe Bupilo Bobusafeli.

<sup>128</sup> Mulemuhe, na lumela kuli ne ku na ni sesiñwi se ne si shutana ku sa na nani, kusi cwalo nasike ku bulela kuli, “Muluti Yomunde, ki sikamañi se Ni lukela kueza cwale?”

<sup>129</sup> Mwabona, na bata kueza sika sesiñwi yena ka buyena. Cwalo kona mo lu ezezanga, lu batanga ku ikezeza sika luna bañi. Mpo ya Mulimu ki mpo ya mahala. Mulimu u mifile Yona, hakuna nto ni yekana ye mueza ka Yona. Ki Yena yana I tomezi mina, mi kipeto mukaba ni Yona. Mwabona?

<sup>130</sup> Mulemuhe, na zibile kuli Ne i liteni fani. Na lumezi ku Yona mi na I bata. Kono cwale hana talimani ni mwa ku ezeza ka zona, ne ku shutani kuya ka sizo sa hae. Neli shutano. Na swalelezi kwa masheleñi a hae ni kuba wa keleke ya nali ku yona, ni zeñwi cwalo. Kono Jesu na zibile cwalo, ni kuziba kuli na kumalezi kwa masheleñi ani, mi ki Hali, “Zamaya ulekise kaufela zo luwile, mi ulife kwa babotana. Mi utahe, lwala sifapahano sa hao mi u Ni latelele, mi kipeto ukaba ni sifumu mwa Lihalimu.” Kono na palezwi kueza cwalo.

<sup>131</sup> Baeteleli babañwi bana nani mwa mazazi a bunca bwa hae, ne ba nani susumeza ku yena kufitela ahana ku amuhela Nzila ye ne lukisizwe ki Mulimu, ya nali Jesu Kreste; yena fela Anosi ya sweli Bupilo Bobusafeli, yena fela Anosi ya kona kumifa Bona. Ha ki keleke yekona kumifa Bupilo Bobusafeli; ha ki wa kuyaha mabapa ni yena; ha ki mulisana wa hao; ha ki muprisita wa hao; ha ki tuto ya tumelo ya hao; kwanda Jesu Kreste Kasibili fela ki yena ya kona kumifa Bupilo Bobusafeli. Ki yena . . .

<sup>132</sup> Hakuna taba kamba u yomunde cwani, so tuhezi kueza, so kalile kueza, u lukela ku amuhela *Mutu* yena Mulena Jesu Kreste. Mi cwale u mano eza cwalo, Yena ki yena Linzwi, mi kipeto bupilo bwa hao bu zamaeleta hande mwa Linzwi mi La iponahaza ili Lona mwa lusika lo pila ku lona lo.

<sup>133</sup> Nuwe nana ni kueza cwalo kuli Linzwi li iponahaze mwa lusika lwa hae. Cwale, ku cwani he kambe Mushe hana tile, nakali, “Lwa ziba sa na ezize Nuwe, lukanga linzwi la Nuwe. Luka eza fela ona cwalo mwana ezelize Nuwe. Lu ka yaha a—a areka mi lu cimbauke fa Nuka ya Nile, ni kuzwa mwa Egepita”? Kiñi, ne lisike za beleka. Mwabona, lwani neli lusika lusili.

<sup>134</sup> Jesu na sike kutaha ni liñusa la Mushe; Luther na sike kutaha ni liñusa la ba Katolika; Wesley na sike kutaha ni liñusa la

Luther; ba Pentekota neba sike kutaha ni liñusa la Wesley. Mi ni Munyaliwa hakoni ku bupiwa mwa kopano ya ba Pentekota, zeo fela halikoni. Mi yani luli ki niti. U ikonga kongile ni kuzwela kwande kwani, mi ki yani uinzi fani, inge fela babañwi ba kubona. Ki sikapi. Kuswana fela sina bupilo ha bu taha mwa . . . Mwabona?

<sup>135</sup> Muñoli yani, sina hane Ni bulezi busihu bobuñwi, muñoli yani ya na ñozi buka ye . . . Mi ha ki kuli na ni kananisa hahulu ha butuku, ali Ne ni swanelo kuba “diabulosi, haiba ne ku na ni sika se si cwalo.” Kacwalo ki ha bulela kuli na sa lumeli ku Mulimu. Ki hali, “Mulimu yana ka puta mazoho a Hae ni kuina ni kubuha babulaiwa bani, mwa masika a makalelo, mi aipapate kuba ni mata a ku kwalula Liwate Lelifubelu, mi atuhele basali bani ni banana ba pazuliwe mwa bu emba emba ki litau ni zeñwi cwalo, mi kipeto a bulele kuli Nali Mulimu ya lilato.” Ali, “Hakuna sibupiwa se si cwalo.” Mwabona, mutangana, asina susumezo ya Linzwi, apaelawa ku I bona.

<sup>136</sup> Sikunka sa pili sa buloto, yena Munyali, nana ni kuwela mwa lifasi kuli a zuhe hape. Kona mwana ezelize ni Munyaliwa wa pili yana pepilwe ka la Pentekota nana ni kukena mwa Linako za Lififi sina peu yeñwi kaufela, ili kupumbekwa. Ne ina ni ku shwa. I lukela ku ba ona cwalo. Kono ne i kalile kushoshela hape ku Luther, mwa nako ya kushimbuluka kwa pili. Ne isa bonahali inge kuli kona peu ye ne keni mwa hali, kono neli Liseli la lizazi lani. Lutaka ki ha lutoya mwa sibunga, Wesley. Mi kuzwa mwa sibunga se iya mwa Pentekota, ona sikapi.

<sup>137</sup> Ha mu bona mwa buloto, ha lu taha lwa pili, sikunka sa buloto, muuna ya cezi buloto, hauya kwande ku yo bona buloto bwani mo bu bonahalela, bu bonahala fela inge bubeke. Kono ha ukanga kabemba ni kuinafafasi ni kunga buloto bwani ku bu kwalula, hakuna bubeke mwateni ni hanyinyani. Ki sikapi fela. Mi kuzwa fo kutaha sikamañi? Si—si pangilwe cwalo, kuli siswale buloto. Mwabona? Mi cwale, taba ya pili mwa ziba, bupilo ne bu zwile mwa—mwa—mwa lutaka kukena mwa sibunga; kusiya sibunga kukena mwa sikapi; isiya sikapi mi ni kukena mwa buloto. Likalulo zetalu, mwabona, za zona. Mi kipeto mifuta ya Buloto *kwande* a likalulo zetalu (Luther, Wesley, Pentekota). Ona cwalo fela. Mwabona, hakuna kukakanya. Hamukoni ku lyanganisa ze bupilwe.

<sup>138</sup> Cwale mutualime, lilimo zetalu kaufela foo Liñusa hali bile li lumiwa kuzwa ku Mulimu, ba ikonganga kuikopanya. Le se libile mashumi amabeli, mi hakuna kopano. Haina kuba cwalo. Mwabona? Cwale sikapi sina ni ku yebuha kwateni, kufa sibaka Buloto kuli buine fapila Mwana, kuli bu buzwe; Liñusa li taha ka kukutela mwa Keleke hape, kupanga Mubili wa Jesu Kreste kuswana fela sina Yani ya makalelo yene keni mwa mubu. Cwale, kwa kubona—kubona Bupilo Bobusafeli.

<sup>139</sup> Bupilo, kaniti ona—ona lutaka kwanu ne lu lwezi Bupilo. Kaniti, ne ili cwalo. Kono, mwabona, hane itiloba lutaka mi se i fela, kopano, Bupilo ne bu shimbuluze ku Wesley; ni kutaha kwande, kukena mwateni. Mi ona fani, yeñwi ni yeñwi ya zona . . . Hañwi, ili sitali se situna, ne isa bonahali sina bubeke. Kono cwale mununo o munyinyani ha utaha, sina ona . . . kwa neku la—neku la sikapi . . . kamba kwa lutaka, mununo wa kwa sibunga, si bonahalanga mane inge kona bubeke. Kono ha si shetumukafafasi kutaha mwa sikapi sani, li fa kaufi fela.

<sup>140</sup> Kikuli Jesu na si ka bulela kuli, “Mazazi a maungulo” (Mateu 24:24) “zepeli li kaba hahulu bukaufi kuli mane lika puma ni zona lipeu luli, baba lelilwe pili, bona Baba Ketilwe, haiba ki nto ye ne konahala”? Bukaufi mane ni sika sa luli, mwabona. Kacwalo, mwa mazazi a mafelelezo. Cwale, mwa bona, seli nako ya buloto cwale. Seiba nako ya kutulo. Lo ha ki lusika lwa Luther, lo ha ki lusika lwa Pentekota, lo ki lusika lwa Munyaliwa.

<sup>141</sup> Sina Mushe mwa na bizelize naha kuzwa mwa naha, Kreste kacenu ubiza Keleke kuzwa mwa keleke, mwa bona; taba yeswana mwa mufuta wa teni, uba isa kwa Naha ya Sepiso ya Kuyakuile ye kanya.

<sup>142</sup> Cwale, ku hana Mutu yani ya sweli kubiza, Kreste, hakuna taba kamba u wa Pentekota, Methodist, Luther, kaufela soli sona, u lukela kuba . . . Lusika lo! Hakuna sa ku balwaniseza, hakuna ni hanyinyani, kono mwa lusika lo *cwale* mu lukukela ku amuhela (sina mo ne ba ezelize mwa lusika lwani) yena Mutu wa Kreste ki yena Linzwi!

*Kwa simuluho ne ku na ni Linzwi, mi Linzwi naali ku  
Mulimu, mi Linzwi ne li Mulimu.*

*Mi Linzwi la eزوا nama, mi la to yaha ku luna, . . .  
. . . ya swana maabani, . . . kacenu, ni kuyakuile.*

Maheberu 13:8. Mwabona, mu lukela ku amuhela Mutu yani wa Bupilo Bobusafeli!

<sup>143</sup> Cwale, Bupilo bwana nani Luther, neli kubeiwa baba lukile. Wesley neli kukeniswa, ku ekeza kwateni. Ba Pentekota neba nani kukutisezwa kwa limpo ha likutela kutaha ku yona, ku ekezwa kwateni. Kono cwale ki ku talelela mwa mubili, mwa bona, likalulo zetalu za teni, mi kuzwa mwani . . . Cwale, cwale zuho haitaha, ona Bupilo bone bu pila ku bona ma Lutheran bani, kona bo bu zwile, Bupilo bone bu pilile mwa ma Methodist kona bo ne bu zwile, Bupilo bone bukeni kuba Pentekota, buka ngelwa kaufela mwa Mubili wa Munyaliwa o ka shimbiwa fapila Jesu Kreste. Kanya ku Mulimu! Oh, kwa tabisa! Ki Niti!

<sup>144</sup> Lu fitile mwa lilulu! Lu talimezi kwa Lihalimu, lu libelezi kutaha; Sikwaheliso sa Mundandwe o pahami, sina mo lu kona

ku bulelala, ku kuta kwa Hae! Keleke i lukela ku zusiwa cwanoňu, mi lu lukela kuitukisa.

<sup>145</sup> Mi nzila fela ye mukona kuitukisa ka yona, ha ki kubulela kuli, "Kihande, Ni wa ba Assemblies. Ni wa ba Oneness, Twoness," kamba seo kaufela sili sona, kaufela bona, "Ni wa ba keleke ya Mulimu," sani ha si talusi sika kaufela. "Bo ndata luna ne ba huwile ni kubina," sani si petehile fela, lani neli lizazi la bona. Kono *kacenu* mu talimana ni kopano ye ba pangile, kono ka Bupilo bo bu zwelapili, yeli yena Jesu Kreste.

<sup>146</sup> Mutangana yo na ezize taba yeswana. Mushe na ñozi litaelo. Kono, mwa bona, yena Mulimu yana ñozi milao, ka mupolofita wa Hae, neli taba yeswana yene polofitile kuli lizazi la taha, "Ni ka zusa Mupolofita ya swana sina na. Mi ku ka ezahala kuli kamukana ya si ke ku Mu utwa uka bulaiwa"; kukutela mwa makapi ni sibunga sa kopano. Li lukela kuya kwa Bupilo. Mi *kacenu*, musike mwali, "Ni wa Pentekota. Ni wa siemba *se*, Ni wa siemba *sani*." Sani ha si talusi sika. Mu lukela ku amuhela Mutu wa Kreste, Bupilo Bobusafeli. Li talimani ni mañi ni mañi wa luna! Musike mwa libala seo.

<sup>147</sup> Baeteleli babañwi, mwa bona, neba nani mata a buinelo bo butuna hahulu ku yena. Sicaba sa bona si lutilwe, "Kihande, lu ba siemba *se*, mi lu ba siemba *sani*," mi be nani mata amatuna hahulu ku yena. Kono ki taba ka butata cwani, kwa ku hana bueteleli bwa Bupilo Bobusafeli!

<sup>148</sup> Cwale, ona Bupilo bwani buteni busihu bwa *kacenu*. Yani ni niti. Moya o Kenile uteni mo, yeli yena Kreste mwa mufuta wa Moya; Moya wa Hae, tozo i teni mo.

... *fa nako nyana, mi lifasi halina ku ni bona hape;*  
haili *mina muka ni bona:* . . .

. . . *Kakuli Ni kaba ni mina, mane mwahali ku mina,*  
*kuisa mwa maungulo, kwa mafelelezo a lifasi.*

<sup>149</sup> Jesu anosi ki yena ya kona ku mi zamaisa kuya kwa Bupilo Bobusafeli. Hakuna keleke, hakuna kopano, hakuna mukutazi, hakuna muprisita, hakuna sika se si kona ku mi zamaisa ku Bona, mu lukela ku zamaiswa ki Yena, yena fela Anosi ki yena ya kona ku mi etelela.

<sup>150</sup> Kana mwa kona ku nahana ka Yena a mi etelela kuzwa mwa Linzwi la Hae, kanti leo ili Yena? Mi haiba ki Yena Linzwi, mi mu siemba sa Hae, kikuli hamuna kuba siemba sa Linzwi? Linzwi leo Mulimu abata kusela mezi a puluso ku luna *kacenu*, kwa ku Mu lemuha *kacenu*; sina baapositola mo ne ba Mu lemuhezi, sina Luther, sina Wesley, sina mwa sicaba sa lizazi lani mo ne si Mu lemuhezi. Lo ki lusika lusili. Ki Linzwi! Linzwi ne li bulezwi ona lika ze lubona ze sweli ku ezahala cwale, kuli li bulezwi kuli lika ezahala mwa hola ona ye. Kacwalo mu amuhele Jesu Kreste mi mutuhele kuli a Mi zamaisa kuya kwa Bupilo Bobusafeli.

<sup>151</sup> Ni ha na konile, mutangana yo... Na ipumanezi lika zende kaufela. Mwa sikolo, neli zende. Kakuba mushimani yomunde, hakuna kukakanya, nabile yomunde. Kakuba ndate yomunde... Mwa ku teeleza ku ndatahe mwa lika za pisinisi, nabile mushimani yomunde—mushimani yomunde. Yomunde kwa bashemba ba hae. Nabile ni likute ku muprisita wa hae. Nabile ya likute kwa keleke ya hae. Nabile ya likute kwa litaelo za Mulimu. Kono na latehezwi ki taba yetuna, mi ze siyezi zeñwi ne li sika talusa taba ya butokwa ku yena fani hana hanile bueteleli bwa Bupilo Bobusafeli, Jesu Kreste.

<sup>152</sup> Mulemuhe! Bueteleli bo bu talimani ni mañi ni mañi wa luna kacenu, ona taba yeswana sina mwana kile a ezeza mucaha yani, luna... hakuna taba kamba lu ba bulapeli cwani. Wa kona kuba wa Katolika, wa kona kuba wa Baptist, Methodist, kamba wa kona kuba wa Pentekota, kamba kaufela soli sona, ona taba yeswana ye ikulibile busihu bwa kacenu: Bupilo Bobusafeli, sani, ki ku amuhela Jesu Kreste. Lu filwe kolo ye.

<sup>153</sup> Fokuñwi mwa bupilo lu lukela ku talimana ni lika sina fela mutangana yo mwana ezelize, kakuli mu batu baba butu bo bu shwa mi mufilwe—mufilwe kolo ya keto. Muna ni keto. Mulimu na ipangile ili kuli mukete. Haiba Na beile Adama ni Eva fa buiketelo bwa tukuluho kona kuli ne ba kona kuketa, mi ki ha ba eza keto ye fosahesi, mi, mwabona, Hakoni kueza ka mukwa usili ku mina kufita Mwa kile a ezeza ku bona. Una ni ku mi beya fa taba yeswana kuli mukete kamba ku hana.

Mu na ni keto. Halu talimeni ku zeñwi za zona:

<sup>154</sup> U nani keto, kakuba mutangana, nji uka ituta kamba hauba ku ba ya itutile. Una ni keto yeo. Wa kona kubata kuba “ya sina fela sika,” wa kona fela ku si naha.

<sup>155</sup> Una ni keto ya mo pilela ka likezo za hao. Ni ka holofaza nyana fa cwale. Mwabona? Wa kona kuzwela kwande ni kutuhela milili ya hao ibe yewelafafasi mi ube Kambombo kamba sitimbi sesiñwi fela.

<sup>156</sup> Kamba mina basali, mwa kona ku bonahala inge—inge mutu ya ikutekile kamba mwa kona kuba alimuñwi wa libupiwa ze ipitezi zani ze lu nani kwande kwani, ona linyunywani za meto a bulu zani. Ni litoho ze kukuzwi sina mezi ni lika zeñwi, ki ze lwanisana ni Linzwi la Mulimu, ili mane ze lwanisana kakutala; kutokwa mane ni haiba kufa...ku palelwa kufa tapelo kuli iamuhelwe. Yani ki Niti. Yani kaniti i cwalo. Sani kona sene i bulezi Bibebe.

<sup>157</sup> Kono ki sikamañi sene si ezahalile ku mina, keleke? Mu boni zeñata hahulu za televishini, zeñata hahulu za lifasi, ki ze bunolo hahulu kwa sibupeho sa Adama wa mina kale kuli akene cwalo, kueza sina babañwi ba bona baba siyezi.

<sup>158</sup> Mwendi ni kutele se hape! Mwa sinkwa sa niti, mwa kufa sitabelo sa—sa—sa swalelo mwa mazazi a Mushe, fani Mushe ha

na lukuluzi bana, neku lukela kuba mazazi a supile kuli kusike kwaba mumela mwahala sicaba. Mutu kaufela wa ziba cwalo. Mwa Exoda, “Hakuna mumela o ka fumaneha mwa mafulo a mina ni hanyinyani, mazazi a supile.” *Mazazi a supile* na yemela “likeleke za linako zesupa.” Mwabona?

<sup>159</sup> “Hakuna mumela.” Cwale, ki sikamañi sani? Hakuna tuto ya tumelo, hakuna lifasi. Jesu naize kuli, “Haiba ulata lifasi kamba lika ze mwa lifasi, lilato la Mulimu mane haliyo ni ku wena.” Mwabona? Mi lu lika ku zwakanisa zani; hamukoni kueza cwalo! Mu lukela kutaha fa sika *silisiñwi* sa ku lumela: kikuli mu ka lumela Mulimu, mu ka lumela keleke ya henu, mu ka lumela lifasi, mu ka . . . Hamukoni ku li zwakanisa hamoho. Mi hamukoni kuswalelala kwa lika za kale zani zeo keleke yeñwi ne i ezelize fapila mina. Mu lukela kunga Liñusa la hola.

<sup>160</sup> Na bulezzi kuli, “Sene si siyezi kuba nkukwe, musike mwa si tuhela kufita kakusasana (kuli sitahe mwa lusika loluñwi lo), mu si cise ka mulilo; si sinyiwe.” Kuli lusika lo mupila ku lona, ona Liñusa la lusika lo, Li na ni kutiswa kuzwa mwa Mañolo ni kupakiwa ni ku lemuhiwa ka Mulimu kuli ki Mulimu ya eza cwalo. Kona kuli fo mu ka amuhela Sani kamba ku Si hana. Bwani ki Bupilo Bobusafeli, bueteleli bwa Moya o Kenile, kuetelela Keleke ya Hae.

<sup>161</sup> Ne lu ka ina foo nako yetelele, kono ha lu shenyeni, luzwele fela pili ku zamaya.

<sup>162</sup> Keto ya miezezo ya mina. Mwa kona . . . Hamukoni ku likopanya cwale. Mukona kuba kwa neku la Mulimu kamba kulwanisa Mulimu, mi mibonahalelo ya kwande i bonisa se sili mwahali. Mwabona? Sikapi . . . Buñata bwa mina mu nahana kuli, “Ni na ni kolobezo ya Moya o Kenile, Na ya kwa Lihalimu.” Sani ha si talusi nto iliñwi kuli wa ya kwa Lihalimu. Batili, sha. Wa kona kuba ni kolobezo ya Moya o Kenile hola ni hola mwa bupilo bwa hao, mi niteñi wa lateha ni kuya kwa lihele. Bibebe i bulezzi ona cwalo. Uh-huh, yani ki niti luli.

<sup>163</sup> Mutualime kwanu, mina mu batu ba kwande. Mu nani maikuto a ketalizoho a ambolisana ni mubili wa kwande. Mulimu na mi file maikuto a ketalizoho; isiñi a ku swalana ni Yena, ndu ya mina ya lifasi: kubona, kulwaza, kuswala, kununkelela, ni ku utwa.

<sup>164</sup> Mi muna ni moya mwahala sani, mi una ni linzila ze ketalizoho: lizwalo, ni lilato, ni zeñwi cwalo. Linzila ze ketalizoho ze mu swalisana kwa lifasi la moya ka zona, kono ka moya wa mina.

<sup>165</sup> Za mubili wa mina liswalana ni mubili. Za moya wa mina liswalana ni za moya. Kono mwahala sani muna ni moyo, mi moyo wani kona kokwani ya bupilo bwa bo bu zwa ku Mulimu.

<sup>166</sup> Mi sina mbututu ye bupiwa mwa mba ya maa yona. Fani mbututu haitaha mwa—mwa mba ya bo maa yona ka kokwani ye

nyinyani ya bupilo, iho hobela kukena mwa lii, haipangi kalulo iliñwi ya mutu, se si tatama ki nja, mi se si tatama iba kaze, mi se si tatama ibe mbongolo. Kaufela ona ki likalulo za nama ze yaha mutu wa makalelo ka silama sa bupilo.

<sup>167</sup> Mi haiba mutu upepwa since ka Linzwi la Mulimu, uisiwa kwa Bupilo Bobusafeli, ubizwa “Ya Ketilwe,” ikaba Linzwi la Mulimu fahalimwa Linzwi, Linzwi fa Linzwi! Isiñi tuto ya tumelo ya likopano mi kipeto kutaha Linzwi, kasamulaho ni tuto ya tumelo; kipeto halina kubeleka. Hamukoni kuba ni mumela wani mwahala Lona! Ki Bupilo Bobusafeli fela bulimuñwi, Jesu Kreste yena Linzwi:

*Kwa simuluho ne ku nani Linzwi, mi Linzwi na li ku  
Mulimu, mi Linzwi neli Mulimu.*

*Mi Linzwi la eza nama, mi la to yaha ku luna, . . .*

<sup>168</sup> Balikani, mufepe bana baka. Mu ni lumele kwa buse bwa masimu akwahule mwa lifasi, kuisa Liñusa. Ni lukela kuba ya sephala ni mina. Se Ni talimezi ku sona, mwendi ha muboni. Kona ha Ni li mo ku lika ku mi bulelela. Haki kuli ha Ni lati sicaba, ki kuli Na lata sicaba. Kusikulula. Ha Ni bona kuetelela kwa keleke, i bata ku wa, nili, “Kihande, ne lu ezize se mi ne lu ezize sani,” ni ku talima kafa ni kafa mwahala keleke ni kubona . . . Halina fela kubeleka.

<sup>169</sup> Kona kuli mutualime mwa Bibebe ni kubona kuli ku lukela kuba cwalo kwa mafelelezo, ona Lusika lwa Keleke ye enya ya Laodesia yani, ku kasheza Jesu kwande (yena Linzwi). Na si ka biza . . . Yena hana kubiza keleke ni yekana. Na bulezi kuli, “Bao Ni lata, Na kalimela. Na ba shapa.” Na ngile Linzwi ni ku Li sululela fateni, ni kubulela, “Mu fosize ku lona!” Lani kona libaka le Ni mi latela. “Haiba u ka kwalula sikwalo ni ku Ni lumeleza kukena, Ni ka kena mi ni ce ni wena.” Isiñi keleke, U lelekilwe kwanda yona.

<sup>170</sup> Ulibile kwa Katengo ka ba Swaliso. Kwani kona kwaile, ona kukutela mwa Rome kwa na zwelela. Mi yani kona niti. Ni ñozi sani fa pampili kuzwa kwa lilimo ze mashumi amabeli ka aketalizoho kwa mulaho, kamba myaha ye mashumi amalalu ka zetalu kwa mulaho, mi ki zani fani. Isiñi zani fela, li ñozwi mwa Bibebe, kuzwa mwa pono. Ukutezi kwa mulaho. Hakuna mukwa wa ku bandusa sani, li felile! Ku kaba ona cwalo.

<sup>171</sup> Mulimu usweli kubiza *mañi ni mañi*. “Ni yemi fa munyako na ngongota. Haiba mutu kaufela, mutu ufi kaufela . . .” Mutu alimuñwi kuzwa ku baba eza sikit, i kona kuba alimuñwi kuba lule.

<sup>172</sup> Sina ha Ne ni bulezi masihu nyana afelelile. Fani Isilaele hana zwile mwa Egepita, ne ku nani fela batu baba eza tuu milioni bene ba zwile, mi ba tuu milioni fela; alimuñwi fela . . . neli fela batu ba babeli bene bailo kena. Alimuñwi kuzwa

kuba ba eza milioni. Kana mukile mwa ziba cwalo nji? Kalebu ni Joshua.

<sup>173</sup> Mi Jesu, fani ha Nali fa lifasi, neba bulezi kuli, “Bo ndata luna neba cile manna mwa lihalaupa. Lu buluka lizo. Mi lusweli kueza se. Lwa ziba fo lu yemi!”

<sup>174</sup> Na ize, “Ni ziba kuli bo ndata mina neba cile manna mwa lihalaupa, mi kaufela bona ba kauhani Kuyakuile. Ba shwile!”

<sup>175</sup> Cwale mata a buuna a zwa ku muuna kamba ku musali, kuna ni mai a eza milioni ataha, kuna ni likokwani za bupilo ze taha. Mi kuzwa ku zona likokwani za bupilo kaufela zani, za mufuta wa... Haiba ki—haiba buzwa komu ya muuna, kamba mutu wa muuna, kamba kaufela seo sili sona, kuna ni fela likokwani za bupilo ze eza milioni, likokwani ze eza milioni ze sebeza. Mwahali mwani kuna ni iliñwi ya likokwani za bupilo zani ye lelilwe kwa bupilo, kakuli kuna ni lii lililiñwi kakuli kuna ni lii lililiñwi mwahali mwani, le lina ni mununo, kuli likopano ni zona. Yani ki niti. Li ka kopana ni lii lililiñwi. Kuswana fela sina mubili ulimuñwi oinzi fa, mi kokwani yani i zwa ku Mulimu. Mwabona? Mi mutualime kokwani ya bupilo yani yenze taha mwahala likokwani zeñwi za bupilo, ni ku minyuka minyuka mwahala ona, kufitanga kwa pata a zona, ku zamaya kwa ni kwa ni ku fumana lii le lina ni mununo ni—ni kukena mwahali a yona; mi zeñwi za zona za shwa.

<sup>176</sup> Ku cwani kambe nekuli cwalo ni keleke kacenu, lililiñwi kuzwa ku ze milioni? Mwabona ko ne li kaba? “Munyako wa kumbana ni Nzila ki ye sisani, mi ki baba nyinyani baba I fumana; kakuli nzila iatami yeisa kwa sinyeho, mi ki babañata baba ya ka yona.”

“Ka ki niti yeo, Muzwale Branham?” Hani zibi, kono Ni bulela fela Mañolo. Mwabona?

<sup>177</sup> Cwale, mu lukiselizwe kwa Bupilo. Mu ka Si bona haiba mu lukiselizwe Sona. Haiba ha mu si ka lukiswa ku Si bona, hamuna ku Si bona. Naize, “Bana ni meto kono ha ba boni, lizebe kono ha ba utwi.” Mu lukela kuba baba itumela lulí, keleke! Mo mu lukela ku ikambuseza ili mina kwa lika ze! Mo mu lukela kubela fa mulilo wa Mulimu! Kuli meto a mina atalime se mubona, lizebe za mina liutwe lika ze mubona. Bueteleli! Ki kabakalañi ha mutile kwanu busihu bwa kacenu ku to teeaza Liñusa la mufuta Wo? Ni biziwa mwahala lifasi kaufela, ka likeleke, kuba “mufitelezi wa tumelo.” Kiñi ha mutile? Moya o Kenile u mi etelezi kwanu (mwabona? mwabona?) ku to teeaza. Kueza mupato! Kupuma kwateni lika za lifasi, ku amuhela tamaiso ya Jesu Kreste, kusi cwalo mu ka shwa kaniti sina lifasi.

<sup>178</sup> Muna ni keto mwa ku ikuteka kwa mina. Mo mu ikutekela, kuitingile ku mina.

<sup>179</sup> Muna ni keto ka musala mina. Mwaya kwande mi muikungela musali. Mubata ku ikungela musali, mu ka bata

kunga ya icemezi ku mina...ku seo mubata za mina... muhupula lapa la mina la kamuso mo likabela. Kana mwa kona ku nahana muuna, muuna wa Mukreste, ha ya kwande ku yo ikungela musali alimuñwi wa ma Ricketta ba kacenu kuba musali mwa lapa? Huh? Kana mwa kona ku nahana cwalo? Ki sikamañi sa nahana muuna yo? Ki ndu ya mufuta mañi ya kaba ni yona haiba uka ikungela muitobaleli ya mapunu, manyaka silupi wa fa mukwakwa kwande kwanu, lihule la fa mukwakwa? “Oh,” mu li, “cwale, aku libeletele fa muzuzu.” Utina cwani? Mwabona? Mwabona? Utinanga tuputula ni lika zeñwi, ki lihule la mwa mukwakwa. “Oh,” mu li, “cwale, Muzwale Branham!” Oh, ona likoci ze kakatezi zani, ku bonahala inge kuli mu selilwe ku zona, lihule la fa mukwakwa.

<sup>180</sup> Jesu naize kuli, “Kaufela ya talima musali ka ku mu lakaza, u sa mu bukile kale mwa pilu ya hae.” Kona kuli una ni ku yo ikalabela ka zona. Mi ki sikkamañi sa ka eza? Na iponahalize ili yena. Ki mañi yana ni mulatu? Munahane ka zona.

<sup>181</sup> Mu li, “Ha baezi liapalo zeñwi.” Bana ni mishini ya ku lukisa. Hakuna buinyazo. Huh-uh. Kona ona cwalo.

<sup>182</sup> Cwale, Hanilati ku mi utwisa butuku. Mi le ha ki lisheha, se KISONA SA BULELA MULENA kuzwa mwa Mañolo. Ki niti luli, mulikani. Na ni mutu ya hulile, Hanina nako yeñata ya kuina, kono Ni lukela ku mi bulelela Niti. Haiba le ki liñusa la ka la mafelelezo, ki Niti. Mwabona? Musike, kezeli. Musike, muzwale.

<sup>183</sup> Mi mina balikani baba swalelezi kwa—kwa tuto ya tumelo, ni ka kuziba kuli Linzwi la Mulimu li zibahalile fa pila mina. Kolobezo ya Moya o Kenile ni litaba za niti ze luna ni zona kacenu, mi kutuha fo, ka bakeñisa tuto ya litumelo za mina, mwa sikuluha ku Lona? Mukona kuba cwana mwana Mulimu ni kulatula Linzwi la Mulimu le li sepisizwe mwa mazazi a maungulo elupila ku ona? Mukona cwani kueza cwalo? Kana Bibebe i kona kubiza cwani ze... .

<sup>184</sup> Sina hane Ni bulezi busihu bwa maabani kaza—kaza mulena nako yeñwi, kwani kwa Mboela, fani hane ba na ni batu ba bansu bene ba lukiswa kuba batanga. Kiñi, ne ba si nto isili kwanda kuba—kuba musika wa limota za kuitusisa, muikungela mutelo wa teko ka bona. Mi Ne ni bilaela, kwa sibaka... Ne ni balile zazi leliñwi ko—ko muleki wa batanga hana tile ku to leka babañwi, mi ki hali, “Kihande, cwale, Ni tabela ku...” Ne ba swabile, ne mu ka ba shapa, ku ba eza kuli ba sebeza kakuli ne bali kwahule ni malapa abona. Ne ba lekisizwe, bali batanga. Mi bona mwa linaha za kwahule ne ba sa zibi sika sifi kaufela, mi ne ba si ke kukutela kwa hae hape, mi ne ba swabile. Ne mu na ni ku ba shapa, kueza kuli ba sebeza. Kono muleki yo ataha kwa sibaka sesiñwi sa litema.

<sup>185</sup> Alimuñwi kwa mitangana yani ni sifuba sa hae fa nde, silelu sa hae mwa halimu, ne mu si ke mwa mushapa. Na yemi hande, mi na tokomezi litaelo za babañwi bani kaufela.

Muleki ali, “Ni ka leka yo.”

<sup>186</sup> Ki hali, “Yo ha lekisiwi. Hanina ku mulekisa. Ha una ku mu leka yo kwateni, kakuli ha lekisiwi.”

<sup>187</sup> Ki hali, “Kihande, ki sikamañi se si mu eza kuba ya shutana?” Ali, “Kikuli ki yena nduna ku bona kaufela nji?”

Ali, “Batili.”

Ali, “Kikuli umufanga lico ze shutana nji?”

<sup>188</sup> Ali, “Batili. Ki mutanga, ucelanga mwa sicelo sa batanga ni babañwi kaufela.”

Ali, “Ki sikamañi se si mueza kuba ya shutana hahulu?”

<sup>189</sup> Ki hali, “Nina ni kile na komoka, kufitela hane Ni tilo batisisa. Kwani mwa Africa (ko ba zwelela, ko Mabunu baba lekanga, ni kuba tisa kwanu ku to ba lekisa kakuba batanga), ona kwani ndatahe ki mulena wa mushobo omuñwi. Mi niteñi, ni hali muzwahule, ali kwahule ni munzi, wa ziba kuli ki mwana mulena. Kacwalo uikunga ka nzila yani.”

<sup>190</sup> Ki kalimela ye cwani kwa Bukreste! Lu swanezi ku yemela Mulimu ni Bupilo Bobusafeli. Kuna ni fela mufuta ulimuñwi wa Bupilo Bobusafeli, mi yani ki Mulimu. Yena fela anosi ki yena yana ni Bupilo Bobusafeli. Mi luna lu likalulo za Hae, kakuli lu libupiwa za Moya wa Hae. Kona kuli lu swanelu ku ikuteka ili luna, basali ni baana, sina Bibele ha ilu bulelela kuli lu eze. Isiñi bo Jezabele ba fa mikwakwa, ni ma Ricky ba kopano; kono micaha ba Sikreste, bana ba bashimani ni ba basizana ba Mulimu, baba pepilwe ka Moya wa Mulimu, ku bonahaza Liseli mwa mazazi a luna ni ku Li hasanya. Yani ki niti luli.

<sup>191</sup> Mo lu bezi baba yambaezi kwahule kuzwa ku Lona! Kiñi? Ona taba yeswana ya na ezize mushimani yo fa. Na hanile, ku hana Bupilo Bobusafeli, kakuli Ne bu ka musinyenza mayemo a hae mwahala sicaba, Ne buka mu sinyenza ona—ona—ona munyaka wa masheleñi, Ne buka mu tiseza butata mwa kopano ya keleke ya habo, Ne bu ka mu sinyenza lika zeñata. Na zibile sene Bu ka mu sinyenza, nali mushimani ya lemuha lika kapili, mi na hupuzi kuli na sa koni kulifa mulatu. Niteñi kono a nahana kuli, “Ni ka sepa fela bulapeli bwaka ni kuzwelapili.” Kono mwatasii pilu ya hae na zibile kuli ne ku na ni sesiñwi ka za Jesu Kreste se ne si shutana kwa baprisita ba lizazi lani.

<sup>192</sup> Mi ni Mañusa amañata a natile mwateni, Liñusa la niti, la Mulimu, la shutana ni mikwa ya kale. Fani foliso ya Bumulimu hane i kalile, ha ki kale hahulu, kana mu lemuhile mo balikanyisi ne ba latelezi? Mwabona? Mi mañi ni mañi kaufela wa bona ulukile mwa likopano zani, ba pila mwateni. Kana kuna ni ya ziba kuli ne kuna ni Liñusa le ne li lukela ku latelela sani?

Kiñi, Mulimu ha lu tabisangi! U hohanga maikuto a ngana ya luna ka sesiñwi, mi Ha hoha ngana ya luna, kona kuli Una ni Liñusa la Hae.

<sup>193</sup> Mutualime fani ha Na tile lwapili mwa lifasi, ni ku kalisa bulumiwa bwa Hae, “O Muluti yomunyinyani, lwa Ku bata kwa keleke ya luna kwanu. Lwa . . . U tahe kwanu.” Yena Mupolofita yomunyinyani. “Oh, lwa Ku bata kwanu. Taha kwanu.”

<sup>194</sup> Kono zazi leliñwi Ayema mi ali, “Na ni Ndate lu nto Iliñwi.”

<sup>195</sup> “Oh, mawi! U ikeza Iliyena kuba Mulimu.”

<sup>196</sup> “Kwanda kuli mu ce Nama ya Mwana mutu ni kunwa Mali a Hae, hamuna Bupilo ku mina.”

<sup>197</sup> “Ki silumba! Haluna sa kueza ka sona.”

<sup>198</sup> Baapositola bani bainzi hande fani; babañata ka ma sauzande ba Mu siya, kono baapositola bani neba lukiselizwe kwa Bupilo. Na bulezzi ona cwalo. Neba sa koni ku Li talusa; ne ba Li lumezi. Ne ba pilile hande ni Lona kakuli, neba ize, “Neku sina mutu yana kona kueza musebezi ye.”

<sup>199</sup> Ni haiba baprisita neba ziba cwalo. Nekudema naize, “Lwa ziba” (bona ba katengo ka Sanhedrin) “kuli hakuna mutu ya kona kueza musebezi ye konji haiba uzwa ku Mulimu.” Mwabona?

<sup>200</sup> Pitrosi, ka Lizazi la Pentekota, naize, “Jesu wa Nazareta, Muuna ya supilwe ki Mulimu mwahala mina. Mulimu nali ni Yena.”

<sup>201</sup> Mutualime mwa Mañolo, seo Mañolo na bulezzi kuli na ka si eza. Jesu naize kuli, “Mubale Mañolo, ku Ona mu hupula kuli muna ni Bupilo Bobusafeli. Ki ona a paka za Ka. Kambe mu zibile Mushe, ne mu ka Ni ziba nina, kakuli Mushe na ñozi kuli Ni ka taha, mwa mufuta wo ne Ni ka taha ka ona.” Na tile sina Mwana mutu.

<sup>202</sup> Utahile mwa mabizo amalalu, kakuba Mulimu. Amalalu (sina Ndate, Mwana, ni Moya o Kenile), Mulimu ya swana, ki milelo ye milalu.

<sup>203</sup> Cwale he, hape, kubeiwa ka kuluka, kukaniswa . . . ; Luther, Martin, ni—ni ba—ni ba Pentekota; taba yeswana: milelo ye milalu, libaka zetalu, linako za likeleke zetalu.

<sup>204</sup> Taba yeswana: mezi, mali, ni moya. Oh, kuswana sina hamuya mu shetumuka, likalulo zetalu ze mi kenya mwa mibili. Sina ha li mi zusa mwa kupepwa kwa nama, si swanisisa kupepwa kwa mina kwa moya. Mbututu ha pepwa, taba ya makalelo ki mezi, ye tatama ki mali, mi kona kutha bupilo. Yani kona nzila ye mutaha mwa Mubuso wa Mulimu ka yona, ka nzila ye swana. Mwabona? Yani kona nzila yeo Keleke i taha ka yona, ka nzila ye swana. Tabu ye swana. Cwale mulemuhe ka lika zetalu ze, Mulimu u ezize za Hae . . . kupanga mibili wa Hae.

<sup>205</sup> Cwale lu fumana cwana mwahali mo, kuli muna ni tukelo mwa kuketa kwa mina. Muketa musizana ye mubata kunyala; uka mi amuhela, ku lukile.

<sup>206</sup> Mi taba yeñwi, muna ni keto ya kuli mubata kupila kamba hamulati kupila. Mukete cwale mwahala Bupilo ni lifu. Mwa kona kupila.

<sup>207</sup> Mushimani yani nana ni keto yani. Na kondisa mwa lika zeñwi kaufela, muuna wa bulapeli, kono na zibile kuli... Na li bulezi ka yena muñi, "Ni mamezi litaelo ze kaufela kuzwa hane Ni sa li mwanana," kono na zibile kuli na sina Bupilo Bobusafeli. Mwabona? Mi nana ni keto ya ku Bu amuhela kamba ku Bu hana, mi kia hana ku Bu amuhela. Ani neli mafosisa amatuna hahulu akile a eza. Ze siyezi za teni halikoni ku likana. Halikoni, halina butokwa, kwanda kuli munge keto Yeo.

<sup>208</sup> Cwale halu mu lateleleni kwa kuketa kwa hae, mi lubone ko ne imuisize. Cwale, lubona sa na ketile. Cwale, mutualime, nali—nali muuna ya fumile, nali muuna wa pisinisi, nali mubusisi, mi nali muuna wa bulapeli. Lika kaufela!

<sup>209</sup> Kacenu ne lu kali, "Mushimani, ki wa Methodist wa niti, kamba Baptist, kamba wa Pentekota. Yena—yena ki mucaha wa luli, mushimani yomunde luli. Bunde!" Hakuna sene mu ka bulela ka yena; wa maoyo, yomunde, wa liyangu, ni lika kaufela. Hakuna ku sa ikuteka ka yena. Mane na sa zubi, kunwa, kamba kumata mata kwa mikiti ni kubina, ni seo lu kona kubiza kaufela kacenu, sina hane lu ka beya mwa sikuwata sa Bukreste. Kono sani ha ki Bupilo Bobusafeli niteñi! Sani ha ki sona se lu ambola fateni. Hakulata nali ya likute kwa keleke ya habo, ku yana putehelanga kwateni. Kono, mwa bona, mi ne imuisize kwa sikamañi? Kabubo kakatuna. Lu bulele kuli, haiba neli mukutazi, na ka ba... nana ni keleke yende. Mwendu nali muokameli wa puteho kamba bishopu. Mwabona? I mi isa kwa kabubo, mi ne i mu etelezi kwa bufumu ni kabubo.

<sup>210</sup> Ikona kueza taba yeswana kacenu, muna ni talenta yetuna ya kuopela. Ne ni hupula ka mucaha yani nako nyana yana opezi pina yani fa; mwana fezi sani ku diabolosi, mi cwale wa ikutela... Mi ki shutano mañi mwahala hae ni Elvis Presley ni babañwi ba bona. Pat Boone, ni sikuwata se si cwalo, Ernie Ford, micaha ye, baopeli babatuna; ni kunga litalenta za bona, ona litalenta za file Mulimu, ni kuitusisa mi—mi musebezi wa diabolosi. Yani ki niti. Muopeli yomuñwi yomutuna ya lekisa litalenta za file Mulimu ka kabubo mwa lifasi le, kuli abe yomuñwi. Kana mukona kuba cwani "mutu" kufita mo mukona kubela, kuba mutu yomuñwi, kufita kuba mwana Mulimu?

<sup>211</sup> Hanina taba kamba muleneñi kaufela ki wa mina, lifasi kaufela, mi ha mu si ka amuhela bueteleli bwa Bupilo Bobusafeli ka Moya o Kenile (Kreste), kana mu ka kona cwani ku... Ki wena mañi, niteñi? U mutu ya shwile, ku shwela mwa sibi ni

bumaswe! Ka bulapeli mo mubatela kubela; ka ku sephala mo mu batela kubela kwa keleke; mukutazi, haiba mubata kuba fa katala; kono kuhana, mwa shwa!

<sup>212</sup> Nali mutu yomutuna wa sifumu. Nali mutu yomutuna wa sifumu ona mwa bupilo boo. Luli. Lu mu fumana ko lu lemuha... Mi lu fumana mushimani yo, kuli naile... Lu mu latelele fa nako nyana, mi lubona kuli nabile ni sifumu se situna hahulu. Mi lwa mu latelela mwa Bibebe kamukana. Lu lemuha kuli nabile—nabile... Lu mu fumana ali muuna ya fumile. Una ni libaka zetuna luli, na nza zusa bulutu muatuli wa tolopo ni mubusisi wa mwateni, kamba bao kaufela. Upahami hahulu mane ufa situwa sa hae, mi una ni mikiti yemituna; ni maweta babañata hahulu ba basali, ni basali, basizana, ni lika zeñwi kaufela, bukaufi ni yena. Mi kuna ni mukupi yana lobalanga fa munyako, ya bizwa Lazaro. Wa mu fiyelela bungululwa. Lwa ziba likande. Taba yetatama, uzwelapili kuya inza fuma, kuswana fela sina likeleke kacenu mo li ezeza.

<sup>213</sup> Muuna wa pisinisi yainzi mo, na ni bulelela kuli, "Ona mwa California mo, kuli keleke ina ni ku bulelela katengo kakatalima za musebezi sa kueza." Mwabona, seli kutaha kwa keleke ni naha hape. Se li itingile ku mina. Mwa bona, mukeni mwahali mwani, mi munga nombolo ya sibatana ka ku sa ziba.

<sup>214</sup> Haiba mukile mwatisa iliñwi ya matepu aka, muikungela yona, ha Ni ka fita—ha Ni ka fita kwa hae, *Nzila Ya Noha*; mi mu ka bona ko ifumaneha, mwabona ko si felela se. Kuya kwa hae cwale ku yo bulela, haiba nji Mulena wa lata. Ki butelele bo bulikana lihola zene, kacwalo Ne ni palezwi ku kona kueza cwalo ku iliñwi ya mikopano sina wo. Ni lukela kuya kwani ko keleke inyanda ni na fa nako yetetele, ka pilutelele. Mulemuhe. Kono cwale mwa kona ku teeleza kwa tepu linako zeñwi kwa malapa a mina.

<sup>215</sup> Mulemuhe se, cwale lu fumana kuli nali mufumi yomutuna. Mi lu mufumani kasamulaho fa na bezi mufumi ya onyokile luli, kufitela ha bulela kuli, "Ni na ni zeñata hahulu!" Mushimani, na ikezize kuba mucaha yomutuna wa lizazi le. Nji cwani? "Ni haiba matuli aka ayuboka, a sulauha. Mi Ni na ni zeñata hahulu kufitela Ni bulela kuli, 'Oh, wena moyo, ipumulele ikatuluse.'"

<sup>216</sup> Kono, sa na ezize kwa simuluho, na hanile bueteleli bwa Jesu Kreste. Ona keleke ya hae, butali bwa hae, tuto ya hae, ni zeñwi, ne imukenyize mwa bufumu bwa hae. Majuda kaufela ne ba mu lata. Na ba file zona, na ba tusize, hakulata na ezize *se, sani*, kamba *sesiñwi*. Kono, mwa bona, na hanile ona—ona—ona bueteleli bwa Jesu Kreste, ona Bupilo Bobusafeli. Mi sani... Bibebe i bulezi kuli, Na ize kuli, "Wena sikuba, busihu bwa kacenu moyo wa hao na unga."

<sup>217</sup> Mi cwale lu mu fumana (mwa sibaka sesitatama) mwa lihele; ainula meto a hae u bona mukupi yani, yani yana lelekisanga

mwa mukwakwa, mwa sifuba sa Abrahama. Ki mafosisa a cwani! Kuli mane likeleke ne—ne—ne—ne—ne li bile hande mwa nzila yene li zamaya ka yona, kono niteñi ne ba si na Bupilo Bobusafeli.

<sup>218</sup> Si ni hupulisa kutazo yene Ni kutilizwe kwanu ha ki kale hahulu, *Sefa Ya Mutu Ya Nahana*. Hakulata muna ni lona. Ne ni ya, ni zamaya mwahala mushitu, Ne ni sweli kuzuma tumale (litabula le) mi Na talimafafasi. Mi, ka niti, Hanikoni kubulela libizo la kampani ya kwai. Mwa i ziba. Mi fani ne ku na ni—ni sikwakwati sa kwai fani. Mi Ne ni si fitelezi fela, ni nze ni bata... mwa likota. Mi Na bona sikwakwati sani si wezi fani, mi Na talima kwa mulaho hape, ne siize, “Sefa ya mutu ya nahana, maikuto a mutu ya zuba.” Se ni kala fela ku zamaya mwa mushitu.

<sup>219</sup> Mi Moya o Kenile wali, “Fetuha ni u si nope.”

<sup>220</sup> Na i nama ni ku si nopa, “Sefa ya mutu ya nahana, maikuto a mutu ya zuba.” Na hupula, “Tamo ya ma American kwanu, ku lekisa lifu mwatasakuipata, kwa ma American ba habo bona.” Sefa ya mutu ya nahana? Mina... Ni maikuto a mutu ya zuba?

<sup>221</sup> Ne nili kone kuna ni Likezahalo zetuna za Lifasi, ni Yul Bryan... Brynner, ni bona kwa neku lani, fani hana file tatubo yani kaufela. Mi cwale abeya kwai iliñwi ni ku hoha... fa licwe ni kunga... Azusa kwateni musili wa yona ni ku ulamba fa mukokoto wa peba, peba yesweu, mi mwa mazazi a supile ne itezi fela kansa mane ku palelwa ni ku zamaya. Mi se bali, “Wa ziba, ba bulela kuli ‘sefa,’” ali, “ki makilikicani, kuli belekise misanga yemiñata.”

<sup>222</sup> Kutok wahala musili o muñata hahulu kuli diabulosi yani atabele. Yani ki niti. Mi cwale hamunga kwai ye sefilwe, ku kona kunga misanga ye mine kuli ilikane ni ulimuñwi. Ki makilikicani kuli ba mi lekise kwai yeñata. Hamukoni kuba ni musi kwanda kuli mube ni musili wa ona; mi musili wa ona, mu ba ni kansa. Mwabona mo ku inezi? Mi ma American ba libofu, kubata peba yekona kuzwa mwa kuwani kokuñwi, ba wela ku zona. Hamukoni kuba ni zona; ki lifu, Hanina taba ka nzila yemuya ka yona, ki lifu ka nzila ifi kaufela ye mu kaya ka yona. “Sefa ya mutu ya nahana,” mutu ya nahana hakoni ku zuba ni hanyinyani, yani ki niti, haiba luli una ni munahano ni hanyinyani.

<sup>223</sup> Kihande, Na hupula kuli sani sikona fela ku zamaelela ni likeleke. Mwabona? Na sepa, kana Mulimu una ni sefa nji? Eeni.

<sup>224</sup> Mi keleke kamukana ina ni sefa. Yani ki niti. Ba sefanga bona ba ba kena mwa teni, mi ba tuhelela lifu le liñata kukena mwateni hape.

<sup>225</sup> Kana mukona cwani ku hoha kopano mwa Sefa ya Mulimu? Kana mukona cwani kueza cwalo? Kana mukona cwani ku hoha musali ya kutile milili ka Sefa yani? Muni bulelele. Kana mukona cwani ku hoha musali ya tinanga malukwe mwahali Mwani,

kanti “Ki maswabisa ku yena ka kuapala sitino se si lukela kuba sa muuna”? Mwabona, Sefa ya Mulimu ika muswala ona fani, Haikoni ku mutuhelela kuli akene. (Kono keleke ina ni lisefiso za yona.) Kacwalo Ni li kuna ni Sefa ya mutu ya nahana, lani ki Linzwi la Mulimu, mi La swanela maikuto a mutu ya kenile. Yani ki niti, mutu ya kenile; isiñi mutu wa keleke, kono maikuto a mutu ya kenile. Kakuli A kenile, kukena, Linzwi la Mulimu le li si ka zwakiwa! Yani kona Sefa ya mutu ya nahana. Mi membala wa keleke, Ni ku eleza kuli uitusise Yona ye.

<sup>226</sup> Kakuli i kenya lifasi mwateri, mi siemba silisiñwi sa lona ki lifu. Siemba silisiñwi sa umeza, mumela ulimuñwi o munyinyani u umeza sikala kaufela. “Yo kaufela ya ka zusa Linzwi *lililiñwi* ku Le, kamba ku ekeza leliñwi ku Lona, siemba sa hae si ka zuswa mwa Buka ya Bupilo.”

<sup>227</sup> Mwa simu ya Edeni, ki sikamañi sene si tisize lifu, ni maswabi a kaufela, butuku bwa pilu kaufela, mbututu yomunyinyani kaufela ya shwa, kukameha kaufela kwa fa mumizo, ambulasi kaufela ye lila, sipatela kaufela, sibaka sa mabita kaufela? Neli kakuli Eva na kakanyize Linzwi *lililiñwi* (isiñi kaufela Lona), ne fela ku Li fetula. Cwale, Mulimu naize, “Mutu,” kwani, “na lukela ku buluka Linzwi la Mulimu *kaufela*.” Cwale, zani ki za pili za Bibele.

<sup>228</sup> M wahala Bibele, Jesu ataha, mi ki Hali, “Mutu hana kupila ka buhobe fela, kono ka Linzwi *kaufela* le li zwelela mwa mulomo wa Mulimu.” Isiñi fela siemba sa Ona, leliñwi ni leliñwi.

<sup>229</sup> Kwa mafelelezo a Bibele, Sinulo 22, Jesu ufa bupaki bwa Hae kasibili. Sinulo ya—ya Bibele ki Jesu Kreste. Mi Na ize, “Yo kaufela yaka zusa Linzwi *lililiñwi* mwahali mo, kamba ku ekeza *leliñwi* ku Lona, siemba sa hae si ka zusiwa mwa Buka ya Bupilo.”

<sup>230</sup> Cwale, mufite mwa Sefa ya mutu ya nahana *yani*, mukaba ni maikuto a mutu ya kenile ha mu ka zwa Mwani. Niti. Mukaba ni maikuto a mutu ya kenile.

<sup>231</sup> Kezeli, wena ya tinanga liapalo zani, unahane fateni. Uka na u . . . U bulela kuli, “Na sepahala ku bo muuna ka.” “Na sepahala ku nyazi waka wa mushiman.” “Ni musizana ya sepahala.” Kono ku cwani he ka mueza libi *yani* ya na ku talimile? Ha ka yo alabelu bubuki, ki mañi ya na ezize sani? Mwabona, ukaba ni mulatu. Mwabona mo si ñolezwi mwa Linzwi, kacwalo ki . . . Mwabona? Oh, ube musali ya nahana. Ube ya nahana . . .

<sup>232</sup> Wa kona kubulela kuli, “Hakulata mwendi . . .” Kihande, kana ku cwani hane ku ka ezahala ka nzila yeo? Na bulezzi cwalo, mi ni haiba Linzwi *lililiñwi* halikoni ku palelwa. Mwabona?

<sup>233</sup> Muuna yomutuna akile ani bulelela ha ki kale hahulu, ku ni bizeza mwa sibaka sa hae, ali, “Ni ka ku beya mazoho, Muzwale Branham. Uswelu kusinya bulumiwa bwa hao, ka ku kutaza lika ze cwalo.”

<sup>234</sup> Se nili, “Bulumiwa kaufela bo Linzwi la Mulimu lika sinya, bu lukela ku sinyiwa.” Mwabona?

<sup>235</sup> Na ize kuli, “Ni ka ku beya mazoho.” Ali, “No lumilwe ku to lapelela bakuli.”

<sup>236</sup> Se nili, “Kikuli wa lumela lika zani, muzwale?”

Ki hali, “Batili. Kono ha ki musebezi wa luna.”

Se nili, “Ki musebezi wa mañi, cwale?” Mwabona?

“Kihande,” ki hali, “wani ki musebezi wa mulisana.”

<sup>237</sup> Se nili, “Talima fa kopano.” Uh-huh. Yani ki niti. Mwabona?

<sup>238</sup> Mwaha kaufela o Ni tahanga ka ku kutaza lika ze, mi Na nahana, “Kaniti ba Li amuhela,” mwaha o tatama ha Ni yo kuta, kuna ni zeñata ni kufita. Mwabona? Yani ki niti. Si bonisa kuli “Babañata ba bizizwe kono ki baba nyinyani baba ketilwe.”

<sup>239</sup> Bueteleli ki Moya o Kenile, mulikani. Wa mi etelela ni ku mi zamaisa mwa Niti kaufela, kakuli Yena Moya o Kenile ha ka taha. Cwale mu nahane ka zona. Munge Sefa ya mutu ya nahana, yani ki Bibele. Isiñi tuto ya tumelo ya hao, isiñi keleke ya hao; u ka lateha. Unge Sefa ya mutu ya nahana.

<sup>240</sup> Fani kona fo mushimani yani na si ka nahana hande. Na lwezi sefa ya keleke. Na bile ya na ni kabubo, ali muuna yomutuna, “Kono mwa lihele a inula meto a hae, kakuba mwa butuku.”

<sup>241</sup> Cwale mu nge Sefa ya mutu ya nahana, Jesu Kreste, yena Linzwi, mi mu ka lakaza maikuto a mutu ya kenile, kakuli Liku yula sani. Haiba muna ni Moya o Kenile ku mina, Se si ka kulisa sani.

<sup>242</sup> Haiba Moya o Kenile hauyo mwani, mu kali, “Oh, kihande, Hani sepi kuli sani sitalusa shutano kaufela.” Mutualime se mu ezize ona fani! Taba yeswana ya na ezize Eva. Mu kutezi hape mwa sibaka sesiswana.

<sup>243</sup> Cwale haluyeni kwa pili nyana. Cwale halungeni . . . musiye muuna yani fande, yani na si ka itusisa Sefa ya mutu ya nahana. Na hanile ku amuhela bueteleli bwa Jesu Kreste, kwa Bupilo Bobusafeli.

<sup>244</sup> Cwale halungeni muuna ya fumile yomuñwi, muuna wa mucaha wa pisinisi, mubusisi ni kolo yeswana yana bile ni yona muuna yo. Ni ku I amuhela, na amuhezi tamaiso ya Kreste. Cwale, kuna ni ba babeli mwa Bibele be lu ka ambola ka bona. Yani lubona kuli na I hanile, cwale halungeni muuna yo: mufumi yomuñwi, muuna wa mucaha wa pisinisi, ni mubusisi. Mi a amuhela Bueteleli bwa hae.

<sup>245</sup> Mañolo alu bulelela ka za mushimani yo, haiba mubata ku iñola, mwa Maheberu 11:23 kuisa 29.

. . . Mushe, ka tumelo, *ahana ku bizwa mwana mukwae wa Faro;*

*Aketa kushubulwa ka manyando a Mulimu . . .*

*Atalima kuli kushubulwa kwa Kreste ki bufumu bo  
bufita maluwo amatuna a mwa Egepita: . . .*

<sup>246</sup> Mwabona, na amuhezi Bupilo Bobusafeli. Mushe na talimile kuli—kuli—kuli kushubulwa kwa Kreste ki bufumu bo bufita maluwo kaufela ao lifasi ne li nani. Mushe na talimile Sami kuba se situna ni kufita. Cwale, muuna wa mufumi yo na si ka eza cwalo.

<sup>247</sup> Mi Mushe na fumile, mutangana yomunyinyani, ku to ba Faro. Nali mwana mushimani wa Faro, mi na lukela kuyola lubona. Mi na talimile ku ze sa konahali, sikuwata sa balubi ba sileze, sikuwata sa batanga. Ka tumelo na boni sepiso ya Mulimu, ka Linzwi, “Kuli sicaba sa hae ne si ka yambaela mwa naha ya kwahule fa ye mianda ye mine, kono ne si ka lukululwa ka lizoho le li mata.” Mi na talima Sani (haleluya) bufumu bo butuna kufita sifumu sa mwa Egepita, kakuli na hanile Egepita asazibi kwa na ya. Na etelezwi ki Kreste. Na hanile!

<sup>248</sup> Mi nana ni liutu la hae fa lubona, mi na ka ba yena—yena Faro ya tatama mwa Egepita. Kono na talimile kushubulwa kwa Kreste. Kushubulwa! Kuli abizwe “ya ipitezi,” abizwe ya “fitelezi tumelo,” kunga sibaka sa hae ni balubi ba sileze ni bafitetelezi ba tumelo; kakuli na boni kuli hola, yeo Liñolo ne li sepisizwe ku talelezwa, ne se i fitile.

<sup>249</sup> Mi O keleke, amu zuhe! Kikuli hamuboni taba yeswana busihu bwa kacenu? Hola ye sejisizwe ku luna. Mutualime kuli kushubulwa kwa Jesu Kreste ki bufumu bo butuna kufita kopano ya sika sifi kaufela; haiba kunga ndate ni me, keleke, sika sifi kaufela. Mu latelele tamaiso ya Moya!

<sup>250</sup> Halu lateleleni Kreste yo ka bunyinyani nyana, Mushe yo, fa nako nyana, yana ezize sani; ha lu talimeni bupilo bwa hae. Taba yapili, hana itumelezi kunga ku shubulwa kwa Kreste ni kuhana tuto ya hae, kuhana butali bwa hae kaufela . . . Na lutilwe mwa butali kaufela bwa Maegepita. Ni kakubo ka kuzibahala kwa hae, lubona lwa hae, katengo ka hae, bulena bwa hae, mushukwe wa hae, lika kaufela zana nani, na li hanile!

<sup>251</sup> Mi mushimani yomuñwi yo na li bata, mi ahana Kreste; mi muuna yo ahana sani, mi a amuhela Kreste. Mi kapili kiñi sene si ezahalile? Nana ni ku ikauhanya iliyena.

<sup>252</sup> Haleluya! Linzwi leo litalusa “Kulumbwe Mulimu wa luna!” Ki bumaswe luli kuli lwa li libala.

<sup>253</sup> Na hanile mabona ni kabubo. Na ka ba ni basizana nyana kwa . . . basali ba kunyala ka mianda anda, mi na ka ba ni mabita mwatasi . . . Kiñi, Egepita kubusa lifasi. Lifasi ne li inzi kwa mautu a hae, mi nali muluwi kwa siemba sa lona kaufela. Kono ka kutilima mwa Mañolo ni kubona lizazi la na pila ku lona, ni

kuziba kuli Sesiñwi ku yena, ona Peu yene lelilwe pili yani ya Mulimu neikalile ku sebeza!

<sup>254</sup> Hanina taba ka mo ne ukabela ya zibahala, kamba mo kona kubela *sakuli*, wa kona kuba muokameli wa puteho, wa kona kuba mulisana, wa kona kuba *se, sani*, kamba *sesiñwi*, kono haiba Linzwi lani la Bupilo Bobusafeli ka Linzwi la Mulimu li tomilwe kuba ku wena, mi ubona taba yani ili bukaufi, ika kala kubeleka, ku zamaya sina ona cwalo. [Muzwale Branham uliza munwana wa hae kukutakela—Mu.] Kukala kuzwela kwande! Kukala ku ikungela Sona!

<sup>255</sup> Mi yena ahana ku bizwa mwana mukwae wa Faro, kakuli na talimile kuli kushubulwa kwa Kreste neli bufumu bo butuna kufita sifumu kaufela sa mwa Egepita kamba sa lifasi. Na ikungezi Sani. Mutualime sa na ezize, na Si latelezi hande. Ku kambama, kapili azwa mwahala sicaba sa habo, sicaba se ne si mu latanga sapili.

<sup>256</sup> Sa kona kuku sinyeza lika kaufela zo nani. Si kona kutokwa ku sinyehelwa ki ndu ya hao, Si kona kuku sinyeza bulikani bwa hao, Si kona kuku sinyeza mukiti wa hao wa malya-lya wa kuca kulamba, Sa kona kuku sinyeza ki sibaka sa hao kwa Kiwanis. Sa kona. Hani zibi seo Si ka ku sinyeza, kono Si kona ku sinya lika kaufela za bu lifasi kamba ze amana ni lifasi. U lukela ku kauhana kuzwa kwa lika kaufela za bu lifasi. Uswanezi kueza ona cwalo.

<sup>257</sup> Mushe na beile lika kaufela kwatuko ni kuya mwa lihalupa ni kota mwa lizoho la hae. Amen! Mazazi mwa mulaho a mazazi afita. Mi mwa komoka kamba na ezize mafosisa? Batili.

<sup>258</sup> Linako zeñata batu bakala ku yanga kwande, mi kipeto bali, “Oh, Ni ka eza cwalo. Kanya ku Mulimu, Na Si bona!” Yomuñwi ami sehe ni ku mi eza lisheha, “Kaniti Ne ni fosize.”

<sup>259</sup> Na ize, “Baba sa koni kuitiisa mwa kalimelo ki bana ba mwa bucwani mi ha ki bana ba Mulimu.” Mwabona, ba zamaiswa fela ki maikuto. Mwabona, yona peu yene Ni bulezi kayona fa nako nyana, moyo wani ne usiyo ka kukala. Ne itozizwe ka Moya, mi na ezize lika kaufela. Oh, mina, bona... Mioya ya luna haiba itozizwe, mwa kona... Ki wa niti, Moya o Kenile wa luli, mi niteñi mwa kona kuba diabulosi.

<sup>260</sup> “Oh,” mu li, “Muzwale Branham!”

<sup>261</sup> Bapolofita ba buhata! Bibebe i bulezi kuli, “Mwa mazazi a mafelelezo ku kaba bapolofita ba buhata.” Jesu naize, “Ku ka taha bokreste ba buhata.” Isiñi “Bojesu ba buhata,” cwale, hakuna ya yema akuzize ka zani; kono “bokreste ba buhata.” *Kreste* utalusa “ya tozizwe.” Baba tozizwe ka buhata; ba tozizwe, kono ki mahata kwa makalelo a bona, mi ba eza lisupo zetuna ni limakazo, ba bulela ka malimi, kubina mwa Moya, ku kutaza Evangel.

<sup>262</sup> Judasi Isikariota na ezize cwalo! Simioni . . . kamba batili, Ni li mu ni . . . Kayafa na polofitile! Balami, wa muipi! Luli, na ezize lisupo kaufela, lika kaufela, mizamao ya bulapeli kaufela.

<sup>263</sup> Kono, mwa bona, mubeye sikapi sa munjeke wa toze ni peu ya buloto mwa sibaka sesiswana ni kusela mezi ku ona ni ku litoza, sibeli sa zona li ka nyakalala. Sibeli sa zona lika hula ka yona, ka mezi aswana. “Lizazi li monyehela baba lukile ni baba si ka luka, mi pula inelela ku baba lukile ni baba si ka luka, kono ka miselo ya bona mu ka ba ziba.” Kana mukona kuba cwani kwahule ni kusaba hande ka Linzwi? Amen. Mwabona se Ni talusa? “Mezi asuluhelanga ku baba lukile ni baba si ka luka,” batoziwa.

<sup>264</sup> Jesu naize, “Baka taha ku Na mwa lizazi lani, ba kali, ‘Mulena! Mulena! Kana ha ki Na yana leleka mioya ye maswe ya diabolosi nji? Kana ha ki Na ya na polofita nji?’ Kana ha ki Na ya na eza lika zetuna ka Libizo la Hao?” U kali, “Mina baezi ba ze maswe, muzwe ku Na, Na mane ha ni mi zibi. Muye mwa lihele la kamita le li lukiselizwe diabolosi ni mangeloi a hae.” Mwa bona? Ki Linzwi lelicwani! Ka buhata. Balapela mwa mbango, kuikataza mwa mbango. Kiñi ha mueza cwalo kanti ha mu lukeli kueza cwalo? Kini hamuka ikungela sika sa kuyolisa kanti Mahalimu atezi sika sa niti? Mwabona? Hamu lukeli kueza sani.

<sup>265</sup> Cwale lu fumana kuli Mushe utozizwe, hakuna sene si ka mu kutisa kwa mulaho. Mizwale ya habo yena luli ne imuhanile kwani; sani ne si si ka mu paleliswa. Naile ona mwa lihalaupa lani. Mi zazi leliñwi kwande kwani, akopana ni Mulimu pata ni pata, ni Siita sa Mulilo inge si nyendaela mwa sicacani. Ali, “Mushe, tubula likatulo za hao, sibaka so yemi ku sona ki se si Kenile. Kakuli Ni utwile sililo sa sicaba sa Ka, mi Ni utwile kutonga kwa bona, mi Ni hupuzi sepiso ya Ka ya Linzwi. Mi Na tuluka ni shetumuke, Ni ka ku luma kwani ku yo ba lamulela.” Kaniti. Na kopani ni Mulimu pata ni pata, na ambozi ni Yena. Na lumilwe ki Mulimu.

<sup>266</sup> Mulimu natile, ona Siita sa Mulilo sani, ni ku paka mupolofita yani yana yemi fani fa lilundu; ku paka kuli nekuli cwalo, fani ha Na ngile mazoho a hae ni kueza mufuta wa limakazo kaufela ni lika zeñwi. Oh, neba na ni balikanyisi. Oh, luli. Ne kuna ni Jambresi ni Janise, bene ba yemi bukaufi, na ezize ze swana ni zene ba eza. Kono ki mañi ya nali wa niti? Mwabona? Ne li kalezi kai? Kana ne li zwa kwa Linzwi? Neli yona hola nji?

<sup>267</sup> Mi kana mwa ziba kuli ona taba yeswana yani ne i sepisizwe hape mwa mazazi a maungulo? “Sina Jambresi ni Janise hane ba hanyelize Mushe, ku kaba cwalo ni kwa baana ba, ba milelo ya bu kwenuheli kuamana ni Niti.” Mwabona, mwa mazazi a mafelelezo. Ni kueza taba yeswana, (kulikanyisa lika kaufela),

ona mwa muzamao o swana, “Kulube kukutela mwa sileze sa yona, ni nja kwa mataza a yona.”

<sup>268</sup> Mina Mapentekota bene ba zwile mwa likopano zani lilimo ze fitile ni ku ba lwaha, bo ndata mina ni bo maa mina; mi mwa fetuha ni kueza lika ze swana zene ba ezize, mi ni cwale ki sileze sesiswana ni mataza. Mwabona? Haiba ne li ezize Keleke ku litaza mwa lusika lwa pili lwa Pentekota, Li ka eza kuli litaziwe hape ni kacenu. Mwabona? Ku lukela kuba cwalo, niteñi, ki sikapi, si lukela kutaha. Sibunga ha si koni kuba fela sinosi; sikapi si na ni kutaha, mwabona, sibyana. Cwale lu pila mwa mazazi a *mafelelezo*, mutualime lika ze sepisizwe mwa hola ye.

<sup>269</sup> Mutualime Mushe yo yana pakilwe. Muzibe! Hana zwezi kwande kwani, babañwi ba mizwale ya habo yena ne ba mu lwanisa, kubata kupanga kopano. Ne ba bulezi kuli, “U i keza inge kuli ki wena fela ya kenile mwahala luna.” “Kopano kaufela i kenile,” Korah ali, Datani. “Ha lu keteni baana mi lu eze sesiñwi.”

<sup>270</sup> Mushe, yena . . . Ne ni mu utwela butuku. Na ile teni kwani, ali, “Mulena . . .” Awelafafasi fa pila aletare mi ali, “Mulena!”

<sup>271</sup> Mulimu ali, “Ikauhanye ili wena ku bona. Ni bile ni zona ku likani.” Akwalula fela mubu mi lifasi la ba miza. Ku felile. Mwabona, na zibile tumo ya hae.

<sup>272</sup> Mulimu ha lumelelani ni likopano, Ha lumelelani ni likwata. U lumelelana ni mutu anosi. Yani ki niti. Kamita. Isiñi ni likwata; mutu anosi, mutu alimuñwi. Mwa mazazi a mafelelezo, Na ize, “Ni yemi fa munyako na ngongota, mi haiba mutu ufi kaufela . . .” (isiñi “sikwata sifi kaufela”) “. . . mutu ufi kaufela yaka utwa Linzwi la Ka, Ni ka . . . ni ku Ni utwa, Ni ka kena ku yena ni ce.” Mwabona, “Haiba mutu ufi kaufela uka utwa.”

<sup>273</sup> Ku konahala cwani—ku konahala cwani kuli maikulofoni ye cwale ipange linzwi kafo kusina kuli ipangilwe cwalo? Ne ni ka huwa fa sibyana sani, ka mata aka kaufela, mi ne kusike kwaba ni tuso. Kakuli se si lukisizwe, ni kupangiwa, kubupiwa, kuba maikulofoni. Mi haiba Linzwi la Mulimu liinzi ku wena kuzwa kwa tomahanyo ya Mulimu, ku wena, “Lingu zaka liutwa Linzwi la Ka. Za ziba hola ya Ka. Muzamai halina ku mu latelela.” Mwabona? Si lukela kuba sani pili. “Kaufela bao Ndate a Ni file, ba ka taha.” Yeñwi ni yeñwi ya zona, mwabona.

<sup>274</sup> Cwale wa zwelapili, kwa mafelelezo a bupilo kwanu. Na fitelezi fela . . . Mulemuhe fani hana tile kwa mafelelezo a nzila.

<sup>275</sup> Mi lu se lu kwala cwale kakuli seli busihu, mizuzu ye twenti-faifi kufita ka teni. Mulemuhe. Cwale, kwa hae fani ki kakusasana. Mwendi seli tuu kamba sili kiloko luka kubulela, “Kuli, se ku kala kuba busihu luli.” Mwabona? Mwabona? Kono cwale, Ni fitelezi masihu amañata hahulu, mwa busihu kaufela.

<sup>276</sup> Paulusi na katalizwe ona Evangelii ye cwana ye mwa lizazi la hae, mi mutangana sa towa kuzwa—kuzwa fa limota ni kuipulaya. Mi Paulusi, ni yona tozo yeswana yani, ka ona Evangelii ye swana yani, a to lobaza mubili wa hae fa mucaha, akutela kwa bupilo hape. Ne ba tabela. Keleke ne i sweli ku pangienda. Sesiñwi ne si sweli ku ezahala. Mulemuhe se ne si ezahalile fa.

<sup>277</sup> Mushe, hana tile kwani . . .

<sup>278</sup> Muuna yana fumile yoo, fani hana tile kwani, kamba, mucaha yana fumile ye lu bulezi ka yena, wa bulapeli hahulu, mi ili wa keleke ni lika zeñwi kaufela, hande, ya itutile, muuna wa pisinisi yomunde, ni lika kaufela, hana tile kwa mafelelezo a nzila, akala kuhuwa, “Neku sina kwa kuhata!” Bu kai bueteleli bwa hae? Na etelezwi ka keleke ya hae, yeseli yeshwile cwale. Na etelezwi ka lifasi le li shwile, mi neku sina sika ku yena sa na lukela kukena ku sona kono kwanda seo lifasi ne li mu lukiselize: lihele.

<sup>279</sup> Kono kiyo fa Mushe ha taha, mutanga ya sepahala yana talimile kuli kushubulwa kwa Kreste neli bufumu bo butuna kufita sifumu kaufela sa mwa Egepita. Hana tile kwa mafelelezo a nzila, ali muuna muhulu, wa myaha ye mwanda ni ye mashumi amabeli ya kupepwa. Azamaya kukambama lilundu, ni kuziba kuli lifu nelili fa pila hae, mi ki ha talima mwa naha ya sepiro. Mi a talima; ainzi kwani bukaufi ni yena, neku na ni Mueteleli, ona Licwe. Na hatile fa Licwe, mi ni Mangelo a Mulimu amu lwala ku muisa mwa Kanya—mwa Kanya ya Mulimu, ku muisa mwa sifuba sa Mulimu. Kiñi? Lilimo ze mianda ye ketalizoho ka yemilalu kasamulaho, na sa etelelwa ka Mueteleli wa hae.

<sup>280</sup> Lu mu fumana fa Lilundu la Kubenya, inza yemi fani ni Elia, inge ba ambola ni Jesu A si ka ya kale kwa sifapahano, milimo ze mianda ye ketalizoho ka yemilalu kasamulaho wa ku shwa. Yena—yena ya Na latile, kushubulwa kwa bulumiwa bwa hae, kuba bufumu bo butuna kufita kabubo kaufela ka lifasi ni masheleni kaufela a lifasi, Mueteleli wa hae na sa mu etelela. Oh, mawi! Na etelezwi! Mueteleli wa hae, Na etelezi ni mwa lifu, miluti ya lifu. Na etelezwi kuya kwa libita. Lilimo ze mianda anda kasamulaho, natilo yema fani hape kakuli, kakuba mwa bunca bwa hae, na ketile bueteleli bwa Moya o Kenile. Libizo la hae li kaba le lituna hakusike kwaba bufumu bwa Egepita. Fani miyaho ya mindandwe haita fetuha maluli, mi ni foo Egepita haisike kuba Egepita, Mushe ukaba ya sa shwi mwahala sicaba kakuli na amuhezi bueteleli bwa Kreste mwa sibaka sa kuya ka mo ne i zamaezi keleke ya habo.

<sup>281</sup> Kuna ni babañwi bene ba ezize lika zeswana. Mutualime ku Enoke. Na zamaile ni Mulimu ka lilimo ze mianda iketalizoho, mi na bilen ni bupaki bwa Kreste “Na tabisize Mulimu.” Mulimu

na nyakisize sani, mi ali, "Hakuna tuso kuli wena ushwe, utahe fela cwalo kwa Ndu musihali wo." Mi ki ha kambama.

<sup>282</sup> Mi Elia. Kasamulaho wa ku lila kuomanya basali baba kutile milili ni zeñwi, sina mwana ezelize mwa lizazi la hae, bo Jezabele ni mipende ya bona ku bona, kasamulaho amano nyikwa ka bona, mi—mi na ezize lika kaufela za na kona kueza, ni baprisita bani kaufela ku mu seha, ni lika zeñwi kaufela, aya kwa nuka zazi leliñwi. Mi fa buse bwa nuka fela ne kuna ni lipizi zene tomilwe kwa sicacani fa buse fani, koloi ya mulilo ni lipizi za mulilo. Ki ha pahama mwateni, ni ku nepela kubo ya hae ku mupolofita ya na mu tatama mwa mulaho wa hae, mi aya cwalo mwa Lihalimu. Na amuhezi bueteleli bwa Bupilo Bobusafeli, kakuli neli Kreste ya nali ku Elia. Oh! Eeni, sha!

<sup>283</sup> Neli sikamañi sani? "U Ni latelele!" Cwale mu lukela kuketa mueteleli *wa mina*. Mu lukela kuketa cwalo, balikani. Mutualime mwa siiponi sa talima ku sona Mulimu, yona Bibele, mi mubone fo muinzi busihu bwa kacenu.

<sup>284</sup> Likande nyana. Mushimani yomunyinyani, nako yeñwi, na pila kwa matakanyani a na. Na si ka bona kale fateni siiponi, mi hana tile kwa tolopo ku to bona bo kezela bo mahe. Mi ne ba na ni ndu...mi mandu a kale na banga ni siiponi fa munyako; Hani zibi kamba mwa hupula cwalo kamba nee. Kono mushimani nyana yo, na si ka bona kale fateni siiponi. Kacwalo na sweli kubapala bapala mwa ndu, mi ki ha talima mwa... "Huh?" Atalima mushimani yomunyinyani yani. Mi sa nyanganyisa lizoho, ni mushimani nyana yani a nyanganyisa lizoho. A hoha zebe ya hae, ni mushimani yani a hoha zebe ya hae. Mi kuzwelapili ona cwalo. Azwelapili ku zamaya kusutelela, bukaufi, mi ha fetuha abulela kuli, "Ima! Kina yani!" Kina yani.

<sup>285</sup> *Mu bonahala cwani?* Ki sikamañi se *mu latelela*? Ki sikamañi se lueza? Mu lukela kuketa *mueteleli* *wa mina*. Mukete kacenu. Mukete Bupilo kamba lifu. Keto ya mina ika itinga ko mu libile kwa Kuyakuile, se mu keta. Muhupule, Jesu naize, "U Ni latelele." Mi ni mina mu memilwe busihu bwa kacenu kueza cwalo. Ni ku Mu latelela kwa Bupilo Bobusafeli mu lukela kutaha kwa litaelo za Hae, yeo ki niti, kona Linzwi. Isi kutaha ka tuto ya litumelo, isi ka munahano wa silundwamanje, isiñi ka seo mutu kaufela a nahana ka Lona, kono ka seo Mulimu abulezi ka Lona.

<sup>286</sup> Mu li, "Kihande, Muzwale Branham, Ni ziba musali ya kona kuba fela hande, uezanga *cwana*. Ni ziba muuna yana fitile ku za *kuli*."

<sup>287</sup> Hanina taba ka se ba ezize. Linzwi la Mulimu, Na bulezzi kuli, "Linzwi la mutu kaufela libe buhata, mi la Ka libe la Niti." Mu lukela kutaha ka litaelo za Hae, kutaha ka milao ya Hae, lona Linzwi. Hamukoni kutaha ka tuto ya litumelo. Hamukoni

kutaha ka kopano. Hamukoni ku Li kopanya cwalo. Kuna ni fela nto iliñwi ye mu kona kueza: mu Li amuhele ka litaelo za Hae, kuli mwa itakaleza ku shwa ku mina bañi ni kwa mihipulo ya mina, ni ku Mu latelela. “Muzwe kwa lika za lifasi kaufela, mi mu Ni latelele.”

<sup>288</sup> Na ziba kuli leo ki Liñusa le li buhali, mi le li lemaka, muzwale. Kono Ne ni si ka taha kwanu ka kuketa—kuketa liñusa kwa sicaba ka ku lika fela kuba eza kuli baopeli, ba huwe, kutoliya. Ni bile mwa mikopano ya buhedeni ko ba ezanga lika ze swana. Ni iseza ngana kwa bupilo bwa mina. Ni mutanga Mulimu ya lukela ku yo alaba fapila Mulimu zazi leliñwi, mi ni bulumiwa bwa ni file Mulena bu ipakile ili bona ka linako zeñata fapila mina.

<sup>289</sup> Muhupule, Jesu naize, “U Ni latelele. U Ni latelele. Uzwe ku so nani, mi u Ni latelele.” Mi yani kona nzila inosi fela ya kuba ni Bupilo Bobusafeli ka yona. Wani kona fela mulyani wa Na file muuna yoo, neli ona mulyani fela wa Na file muuna wa pisinisi yoo, kona mulyani fela unosi Wa fa mutu ufi kaufela. Keto ya hae, Wa ikezeza buiketelo bwa Hae, ki bo bu petehile nako kaufela. Mi lu lukela ku *Mu* latelela, kona nzila inosi fela ya kuba ni Bupilo Bobusafeli. Kacwalo bueteleli bwa Mulimu kikuli: mu latelele Linzwi le li pakilwe la hola ka Moya o Kenile.

Halu inamiseni litoho zaluna.

<sup>290</sup> Ni ka mi buza puzo, mi Ni bata kuli mu be baba sephala. Ni bata kezeli kuli ani lizeze yona, *Ni Utwa Mupulusi Waka Ha Biza*. Ni ziba kuli ki ku bizeza kwa katala kwa kale. Mi muzwale, kezeli, halunze lu bona, mu talime fela se si sweli ku ezahala kacenu. Cwale ka litoho za mina ze inami, munahane fela ka muzuzu o likani, mutualime se si sweli ku ezahala.

<sup>291</sup> Kana mubalile mutende sunda ye felile ka sa na bulezzi muuna yani mwa England? Kuli “Ku kokotelwa kwa Jesu Kreste neli fela buhata, ne li felezi fela mwahala Pilato ni Yena.”

<sup>292</sup> Kana ne mu boni sa na bulezzi muituti yani wa mu American nji? Na bulezzi kuli “Jesu na lobalizwe fa mataka a mwa nuka.” Buñata bwa mina baituti mwa ziba cwalo, kwa mulaho kwani mwa Genese kone i bulezzi ka mataka a mwa nuka. Akona ku mi lobaza inge kuli mu shwile, pilu ya mina ikona kuina isa nati ka mazazi amabeli kamba amalalu fa nako. “Mi hane ba Mu file veine ni nyoko,” ne ba ize, “ani neli mataka a mwa nuka akueza mulyani wa ku lobaza batu. Mi ne ba Mu beile mwa libita mwani, mi A lobala mwani ka mazazi a malalu. Mi, ka niti, hane baile kwani, neba Mu fumana inza zamaya zamaya.” Kana mwa kona ku nahana cwalo? Baituti ba za bumulimu, mukopano ya lituto, tumelo ya ku ikupulela. Cwale ku konahala cwani cwalo mwa lifasi... Nako ya pili, Bibele ne i bulezzi kuli Na hanile, hane ba beile veine ni nyoko kwa mulomo wa Hae.

<sup>293</sup> Mi taba yeñwi, haiba sani siba cwalo, kona kuli ki kabakalañi balutiwa bani “bene batile ku to Mu zwa,” kiñi ze ne ba fezi bupilo bwa bona kuli bu bulawe ka Yena? Mi ba wa, mane ba ipala kuba baba sa lukeli ku shwa mwa Na shwezi; baba futula fa lifapahano kuba shendamisa ni lika zeñwi. Mi haiba nebali... neba ziba kuli Na li muipi mi bona ka bona bañi kakuba baipi, ki kabakalañi hane ba ka fa bupilo bwa bona ku Yena ka mukwa o cwalo?

<sup>294</sup> Oh, mwa bona, kona lizazi la butali bwa toho lelupila ku lona. Tuto, zwelopili, ni mikwa yeminca ka lizazi le, kaufela zona ki za diabulosi. “Zwelopili ki ya diabulosi?” Eeni, sha! Bibele ne i bulezi kuli i cwalo. Zwelopili ye ina ni lifu. “Kana lu kaba ni zwelapili ye cwana mwa lifasi leliñwi?” Batili, sha! Lu kaba ni mufuta wa zwelopili ye shutana. Tuto, lika ze kaufela, ki za diabulosi; sayansi ilyanganisa lika ze bupilwe, kupanga sika sisili.

<sup>295</sup> Mutualime se i ezize ku mina cwale. Fani basizana baba nyinyani... Ba *Reader's Digest* ne baize, sunda kasamulaho... kweli ya mwa mulaho, Na lumela neli cwalo. Ba *Reader's Digest* neba bulezi kuli “Mitangana ni basizana ha ba fita mwa lilimo za bunca, basali mwa kutuhela buino bwa basali mwahala lilimo ze twenti ni twenti-faifi za kupepwa.” Lusika lu loluñwi fela, habana kuba sesiñwi kono kwanda... Ikaba ze sabisa ha litalimwa. Mwabona? Seo libupiwa zani li kaba sona, bunolono, sileze. Mutualime fa—mutalime fa moyo, mutualime fa moyo mo swalezi likeleke, lizwakisa, ku nyalana ni lifasi. Oh, ki hola ye cwani! Amusabe, bana! Amusabe! Amusabele kwa Sifapahano! Mu tahe ku Kreste, mu tuhele kuli Yena ami etelele.

<sup>296</sup> Halunze luinamisize litoho zaluna cwalo, meto aluna a kwalilwe, mi shangwe luinamise lipilu za luna, ka nako ye swana. Kana mu ka eza cwalo? Ni bata ku mi buza puzo. Kana mwa i talima isali mina, ku Mulimu? Mi kana muikutwa kuli hamuyo fo mu—mu lukela kuba mwa hola ye nji? Kakuli Kuungelwa kwa kona kutaha ka nako kaufela. Mwabona, ika taha.

<sup>297</sup> Ku kaba fela, haiba—haiba pulelo yani yene Ni bulezi fa nako nyana ki ya niti, ku kaba fela mwendi batu baba mianda ye ketalizoho mwa Kuungelwa, baba pila, baka cincwi. Kiñi, kunga ba Krestendomu kaufela hamoho, Katolika ni babañwi kaufela, kuna ni fela batu baba eza ma milioni a faifi handeleti, mwabona, baba ipapata Bukreste. Mi alimuñwi ku baba eza milioni, ikaba batu baba mianda ye ketalizoho. Kuna ni batu babañata baba sweli ku tondahala bani zazi ni zazi, mwahala lifasi loote, kuli mane halu koni ni haiba ku alaba za bona. Mwabona, ika taha, mi mane hamuna ni haiba ku ziba za teni. Batu baka zwelapili ku kutaza, ni kubulela kuli... Mwabona, mi ikaba i felile kale.

<sup>298</sup> Sina Jesu hana bulezi. Ne ba ize, balutiwa ne baize, “Ki kabakalañi bañoli, habali, ‘Elia u swanelu kutaha pili?’”

<sup>299</sup> Ki hali, “Sa tile kale mi ha mu si ka mu ziba, kono ba ezize ku yena sene ba bulezi kuli ne ba ka mueza sona.”

<sup>300</sup> Uziba kuli hauyo hande ni Mulimu, mi utabela kuli uhupulwe mwa . . . ku Mulimu, kuli Mulimu abeye pilu ya hao ka kuluka ni Mulimu. Kana hamuna kuba fela cwale ka kuishuwa cwale, mwahala ona nako ya kukuza yee, mu nanule mazoho a mina? Hanina taba ka yo muli yena, kana mu ka eza nji? Mu li, “Ni ka nanula mazoho aka ku Mulimu.” Mulimu aku fuyole. Mulimu aku fuyole.

<sup>301</sup> Kana mutualimela mwa Siiponi? Ni mi kupa ka Libizo la Kreste, kana mwa talima mwa Siiponi sa Mulimu? [Muzwale ubulela ka lulimi lusili. Muzwale watoloka—Mu.] Amen.

<sup>302</sup> Ni bata ku buza nto iliñwi. Ki babakai mo ba bali Mapentekota? Mu nanule mazoho amina, ba bali Mapentekota. Mane buñata bwa mina. Cwale, ki babakai mo baba ipapata kuba Bakreste? Mu nanule mazoho amina, kaufela ko mu inezi, baba ipapata kuba Bakreste. Kikuli muzibile Bibele i bulezi za teni, kuli se si ka ezahala?

<sup>303</sup> Mane ona se ne si ezahalile mwa Testamente ya Kale hane ba bilaela sene ba ka eza, mo ne ba konezi kubela kwahule ni libaka zene sa taha. Moya no wezi fahalimwa mutu mi a polofita ni ku ba bulela kwa ku kopana ni sila, mi mwa kuezeza, sa kuba ni sona fa kukoma sila. Yani neli Testamente ya Kale, kuswana sina ye Nca.

<sup>304</sup> Cwale, yomuñwi wa kona kubulela kuli, “Muuna yani, oh, sani ne sisiyo cwalo.” Kono ku cwani kambe nesili cwalo? Mu li, “Oh, Ni utwile sani sapili.” Kono ku cwani haiba *se si cwalo?* Mwa bona, sani si paka hande kuli mwahali mo kuna ni babañata baba tokwa pilu ye cincizwe, haiba nji wani ki Moya o Kenile o bulela. Kuna ni lika ze tokwa ku ezahala, kacwalo he cwale kuitingile ku mina.

Kamo Ni inezi, kusina ni haiba kupo iliñwi,  
Kono Mali a Hao na ni suluhezi,  
Ni kuli Wena wa amuhela . . .

Sani kona, Na mi bizize ona kwani.

. . . ku Wena,  
O Ngunyana ya Mulimu, . . .

“Ni ka zusa pilu ye mahañi yani, ni ku beya pilu ya nama mwahala yona, ye ka ipeya ku Na.” Mwabona?

. . . taha!  
Kamo Ni inezi, Wena uni amuhele,  
Uka . . .

Kana mu ka ba ni buiketelo bwa mina busihu bwa kacenu?  
Mwa kona ku ba ni yeñwi ya zona.

. . . kenise.

Mu li, "Ni utwile sani ni kwa makalelo." Kono ye ikona kuba nako ya mina ya *mafelelezo* ya ku Li utwa.

Kakuli sepiso ya Hao Na i lumela,

Mibizezo ya kale ya kwa katala, i zwile mwa mikwa ya kacenu, kono Mulimu u sa zamaya mwahala zona. Kikuli ha I utwi ha izamaya ku mina, keleke?

. . . Na taha!

<sup>305</sup> [Muzwale Branham ukala kuñuñuna pina yeli *Ka Mo Ni Inezi*—Mu.] Oh, munahane, kacenu, lipilu li fetuha za macwe, kutala lifasi, ku sa tokwa makeke, ma membala ba keleke, baba enya, sina ku fuma kwani, mucaha yana fumile; mi mane a sa zibi seo Moya o Kenile uyemela, ku ngongota fa munyako wa Lusika lwa Laodesia lo. "Yaka utwa Muhuwo wa Ka (ona Linzwi), yaka kwalula pilu ya hae, Ni ka kena ku yena ni kuca ni yena."

<sup>306</sup> Mi Moya ubulela ka kubulela ku muzwale yo fa mizuzu nyana yefitile, naize, "Ni ka zusa pilu ya licwe yani ku mina, ni kumifa pilu ya nama, ye bunolo ku Mulimu." Mutualime cwale mo se ku bezi, kakuba fela ka—ka butali bwa butu, ka maikuto. Mwabona? Isiñi pilu ye bunolo yetezi lilato ni munati ku Kreste.

<sup>307</sup> [Muzwale Branham ukala kuñuñuna pina ya makutelo—Mu.] Kana hamulati pilu ya mufuta wani nji? Kana mu ka talimana cwani ni Kreste ka maikuto a butu ka Yena? Mu lukela ku amuhela Bupilo Bobusafeli.

. . . na suluhile . . .

Tukiso ne iezizwe mwa Mali.

Ni kuli Wena wa biza . . .

Ki sikamañi sa Na ezize? Na suluzi Mali a Hae. Mi cwale wa mi biza, "Mutahé."

. . . ku Yena,

O Ngunyana ya Mulimu, Na taha! Na taha!

<sup>308</sup> Halu ezeni, Mukreste kaufela, lu nanule fela mazoho a luna ka kukuza cwale mi lu lapele.

<sup>309</sup> O Mulimu, shangwe, Mulena, swala lizazi le lu pila ku lona le. Oh, ku tata hahulu, Ndate. Satani uezize zeñata hahulu kwa sicaba. Lipilu za bona lifetuhile za macwe. Moya wa Hao wa bulela ka ku utwahala; Linzwi la Hao litile hande li namile, li pakile; kono zibo ya mufuta wa kale, ya kupepwa sinca, ba sweli kuli . . . se ifetuhiile kuba ya likopano, zibo ya kuipangela ka minahano, lipina ka buñata, kuhuwa ko kuñata, ni kuzwelapili ko kuñata. Kono, luli, ona pilu ya nama yani, Moya wani, ona Bupilo Bobusafeli bwani, Se ubile wa bueñi kwa keleke.

<sup>310</sup> Mulimu, si bilaeza pilu yaka, mi na nili—nili mueza libi ya pilisizwe ka muhau wa Hao. Si ni eza kuikutwa bumaswe hahulu, Ndate, ka kubona keleke yo No shwezi, ona keleke Yo lika ku liulula. Ni hupula ka za pono yo No file fela ka keleke ya United States ni ya linaha zeñwi. Ha ki mibonahalelo kwa ku sabisa ya rock-ni-roll ya baba mapunu. Kono kwa sibaka sesiñwi Ne ni boni hakutaha yeñwi, yeñwi, yeñwi.

<sup>311</sup> Na lapela, Ndate, kuli haiba yomuñwi wa bani mo busihu bwa kacenu baba supelizwe kwa Bupilo, kamba baba ka tabela ku Bu amuhela, kuli ye ikaba yona hola ye ka ba eza sani. Lumeleza cwalo, Mulena. Lobaka pilu ya macwe cwale, yona pilu ya kale ya lifasi. Mi haiba ba bata kozo, ba bata sesiñwi se si katulusa, sesiñwi se sifa sepiso, ha ba amuhele bueteleli bwa Kreste busihu bwa kacenu ku ba eteleta kwa—kwa Kozo yefita kutwisiso kaufela, Nyakalalo ye sa konahali ku bulelwa ni kanya yeñata, kamba mane sika sakuli ni haiba lifu kasibili halikoni ku sinya. Lumeleza cwalo, Ndate.

<sup>312</sup> Cwale, ka mazoho aluna ananuhezi mwa halimu, Hani zibi haiba . . . Ki babakai mwa muyaho cwale baba ka bulela kuli, “Ni ka yema.” Cwale, Hanina taba kamba ki mañi ya inzi bukaufi ni mina; Ki Mulimu ya ambola ku mina. Mi mubata luli kuba Mukreste wa niti. Mwabona? Sika kaufela si ka . . . Kwanda kuli zani libe malikanyiso; oh, Ne ni ka ikela fela kwande ni be mwa lifasi. Ni lumela kuli ne mu ka ba cwalo, ni mina.

<sup>313</sup> Cwale, muitatube fela ka Linzwi, ka Liñusa. Mutatube seo Mukreste wa niti ulukela kuba sona: ya tiile, ya lilato, isiñi alimuñwi wa Bukreste bwa kacenu bo. Kiñi, bu bunolo, bwa sikama ka bunolo, bu shwile neku, bu bolile, bu zwakani. Mwabona, ha ki Bukreste bwa niti; kupila ka mukwa kaufela wa mufuta, ni kuba kwa keleke. Kana hamulati mufuta wa kopano ye munati yani ni Kreste, ona Moya o Kenile, o muli ona . . . ona ku lumelelana kwa pilu ya mina kwa Linzwi, kuli mukene ku Kreste? Haiba mu bata sani, mi mu lakaza kuli Mulimu abone sani busihu bwa kacenu ona mwahala sikhata sa batu se, kambe ne mu ka eza fela cwalo.

<sup>314</sup> Mu li, “Kana sani si ka talusa nto yeñwi, Muzwale Branham?”

<sup>315</sup> Oh, eeni. Luli, sa eza. “Haiba u Ni swabela fapila batu, Ni ka ku swabela fa Pila Ndate ni Mangeloi a kenile. Kono yena ya ka Ni bulela ni ku Ni yemela mwa naha ye, Ni ka mu yemela mwa Naha yani. Ni ka mu paka fa pila Ka ni Ndate.”

<sup>316</sup> Cwale, hakuna taba kamba ki wena mañi, musali, muuna, mushimani, musizana, yo kaufela uli yena, Mukreste kamba ye si Mukreste, mukutazi, dikoni, seo kaufela uli sona, haiba no ka lumela fela ka pilu ya hao kaufela, fa nako nyana fela, mi ueze seo busihu bwa kacenu ka kutuhela kuli Mulimu azibe kuli u sephalile. “Mulimu . . .”

<sup>317</sup> “Cwale mutualime, Ni wa Pentekota,” mu li. “Ni wa *se*,” kamba seo kaufela uli sona. “Ni ipulela kubinelanga mwa Moya. Kono, Muzwale Branham, Ni hupuzi kuli ibile fela lu ba ni zeo, ne lu ba ni Sona.” Ha una sika.

<sup>318</sup> Haiba mu ni lumela kuna mupolofita wa Mulimu, mu teezeza kwa Manzwi aka. Mwabona? Bwani kona buhata bwa lizazi le. Kana Bibele ne i sika bulela kuli, “I kaba bukaufi hahulu mane ipume ni bona ba Baketilwe kambe ku konahala”? Ba *Baketilwe*, “kushetumuka mwa moyo.”

<sup>319</sup> Kono haiba mubinezi mwa Moya, kono niteñi ni lika za lifasi, kuna ni se si fosahalile. Haiba mu bulela ka malimi; Paulusi naize, “Na kona kubulela ka malimi a batu ni a mangeloi, mi niteñi ha ni si ka piliswa.” Uhhuh, mifuta yemibeli, mwabona. “Na kona kueza maikuto a mibili kaufela, Na kona kuba tumelo, Na kona ku kutaza Evangelii, Na kona kufa bufumu bwaka kaufela ni kufepa babotana, Na kona kuisa Linzwi mwa libaka za kwahule ni kusila . . . kono niteñi ha Ni sesiñwi.” Mwabona? Ki sani sa Mwahala sibaka sa mwahali, muzwale. Sani . . . Moya wa mina uka lila ha mu ka shwa, wa fufa ku ikela, kono moyo wa mina wa pila. Mwabona?

<sup>320</sup> Cwale amu i talime ili mina. Luli, kana mu Bakreste ba niti ba Bibele, ba batezi lilato la Mulimu? Mu hupule, Bibele ne i bulezi kuli, mwa mazazi a mafelelezo fo nako ye ha i ka ezahala, Na ize, “Lingeloi le li swaya ne liile mwahala likeleke, kuya mwahala minzi, ni ku swaya *fela* bani bene batonga ni kulila kabakala maswabiswa ana eziwa mwa munzi.” Ki niti yeo nji? Ezekiele 9, lwa ziba kuli yani ki Niti. Lingeloi le li swaya ne liile kwande ni ku yo beya Swayo fa litoho za bona, lipata, ku yo ba swaya, “Ki kabakala kutonga kwani ni kulila.”

<sup>321</sup> Kasamulaho wa sani kwa taha mangeloi a bulaya kuzwa kwa libaka zene za lifasi, ze sweli kutaha ona cwanoñu nyana fa, lwa libona ha li taha, lindwa li sweli kutaha mwateni ze ka bulaya lifasi kamukana. Neku sina sesiñwi sene asweli kwanda bani bene bana ni Swayo.

<sup>322</sup> Cwale ku yo nopa . . . Kana pilu ya mina iseza ngana kwa baezalibi, ni ka mo keleke ni sicaba ba ezeza, kufitela mukona kutonga ni kulila ka zona musihali ni busihu? Haiba ha ku cwalo, Na bilaela. Ani ki Mañolo.

<sup>323</sup> Kana hamukoni fela ku yema ni kubulela kuli, “Mulimu Yomunde, Hani yemi kakuli Muzwale Branham ubulezi cwalo, kono Ni utwile Linzwi la Hae ha li bulela *sani*, mi Ni ka eza *se*. Ku Wena, Mulena, Na yema. Ni tokwile, Mulena. Kikuli Uka ni fa ze ni tokwile busihu bwa kacenu fa sibaka se nji? Ni yemi.” Mulimu ami fuyole. Mulimu ami fuyole. “Ni tokwile, Ni bata kuli Wena uni utwile butuku.” Mulimu ami fuyole. “Ni bata kuba mufuta wa Mukreste yani . . .”

<sup>324</sup> Cwale, muhupule, yena mutu ya yemi bukaufi ni mina ki nto yeswana fela sina mina. Ni bata kuli mi lukuluhe muswale lizoho la hae, muli, “Muzwale, kezeli, mu ni lapele cwale. Ni bata kuli mu ni lapelele. Ni—Ni . . .” Mubulele fela busepahali kaufela bwa Bukreste, “Mu ni lapelele. Ni ka . . . Ni—Ni—Ni bata kuba ya lukile ni Mulimu. Mu ni lapelele, Ni ka lapela kuli Mulimu amife kolo.”

<sup>325</sup> Na—Na ziba kuli lwa . . . Halu sa kona kuina mo fa nako yetelele; mwa bona sani. Lu inzi—lu inzi kwa mafelelezo a nako. Kaufela mina baba lumela cwalo, mubulele, “Amen.” [Puteho ili, “Amen!”—Mu.] Lu inzi . . . Hakusana se si siyezi. Lik a kaufela li icongile. Likeleke li libile kwa katengo kaba Swalisano. Ni lona lifasi, ki . . .

<sup>326</sup> Mutualime kwamu! Kana mwa ziba seo Mulena abulela ka Los Angeles ni libaka ze kwamu? “I ile!” Mwa hupula sene Ni mi bulelezi, mwendi seli myaha ye mibeli kwa mulaho, kamo zikinyeho ya lifasi neikatela mwa Canada ku kambamba kwamu, Alaska? Ni mi bulelela hape kuli “Hollywood ni Los Angeles za shetumukela mwa liwate. California, u shwile! Mane isini California fela; kono wena, lifasi, u shwile! Keleke, kwanda kuli mube ka swanelo hande ni Mulimu, mu shwile!” KISONA SA BULELA MOYA O KENILE!

<sup>327</sup> Kana mukile mwa ni utwa ni bulela Libizo leo kwanda kuli si to ezahala? Na mi buza! Mu ni zibile seli myaha ye mashumi amabeli. Kana Ni kile na mi bulelela taba ka Libizo la Mulena kono kwanda ze ne ezahalile? Haiba nji lika kaufela ze Ni kile na mi bulelela kuli lika ezahala, li ezahalile, mubulele “Amen.” [Puteho ili, “Amen!”—Mu.] Mwabona? Na mi bulelela, ye kona hola, kuhande kuli mube ka kuluka, kaufela luna.

Cwale mañi ni mañi a lapelele yomuñwi:

<sup>328</sup> Mulimu Yomunde, halunze lu yemi mo busihu bwa kacenu, sicaba se si shwa, lipata za luna li talimile kwa mubu, lona liluli. Lu eza fela . . . U lufile kutazo ye lemaka ye, Mulena. Lu bona mutala wa baana ba babeli. Alimuñwi wa bona, ka kuba muuna wa bulapeli, bene baile kwa keleke kono ni kuhana bueteleli bwa Bupilo Bobusafeli. Mi yomuñwi ahana kabubo ka lifasi ni ku *fetuñela* kwa Bupilo Bobusafeli. Mi lubona buino bo bubeli bwani busihu bwa kacenu, kuya ka Bibe: muuna ya fumile uinzi mwa butuku, mi Mushe uinzi mwa Kanya.

<sup>329</sup> Ndate, lu bata kuba sina Mushe. Lu bata kuetelelwa ki Mwana Hao ya Kenile, Jesu Kreste, kuya kwa Bupilo Bobusafeli. Aku Li fe kwa lipilu za luna busihu bwa kacenu, Mulena. Pazula pilu ya kale ya licwe; kenya ku luna pilu ye nca, yona pilu ya nama, pilu yani Yo kona kubulela ku yona ni ku talimana ni yona, mi haluna kuba baba ikuhumusa ni ku shutana. Mi Moya o Kenile usike wa be u lu siya, Mulena. Ha U tahe mi u beye mazoho fa sicaba se. Bulela ku bona; pazula litakazo za

bona za macwe, mi ubeye teni tato ya Mulimu. Pulusa mutu ufi ni ufi, Ndate. U lufe kwa lilato la Hao. Luise kwa sibaka, Mulena, kuli lube kwahule ni lika kaufela za—za siemba sa maikuto, kuisa kwa kalulo ye tiile luli ya maikuto... yona kalulo ye utwahala mwa pilu, ona butungi bwa Moya, bufumu bwa Mulimu, ona Mubuso wa Moya mwa lipilu za luna. Lumeleza cwalo, O Mueteleli Yomutuna, Moya o Kenile o mutuna, mane U si ka Fufa kale kuya mwa mbyumbyulu ni Keleke ya Hao.

<sup>330</sup> O Mulimu, tuhela kuli ni ikele, Mulena. Usike wa ni siya mwa mulaho, Jesu. Tuhela kuli ni ye ni Wena, Ndate. Hanilati kuli ni ine fa lifasi le ni talima manyando a ka taha. Hanilati kuina mwa bukuba mo. Hanilati ku yema fa hakuna kala ku sabisa... sicaba se sweli ku latehela ki ngana ya sona. Lu talima batu baba eza lika sina libatana ni ku bonahala sina libatana; ni basali balika ku bonahala sina lifolofolo, ka mipende fa lifateho za bona. Ka kuziba kuli lika ze li bulezwi kuli li ezahale, kuli taba yani, ba ka ya ka bukuba luli kufitela linziye li ka taha ze na ni milili sina basali ku to nyandisa basali; ni meeno sina litau, ni lika zona Zo bulezi, buino bwa ngana ya sicaba bu ka lateha kufelelela. Lwa li bona ha li ezahala ona fa cwale, Mulena. Lu tuse! Lu kutiseze kwa maikuto a swana a Kreste Jesu Mulena luna.

<sup>331</sup> O Mueteleli Yomutuna wa Bupilo Bobusafeli, lwa amuhela sepiso ya Hao busihu bwa kacenu, Ndate. Ni kupela sicaba se. Ni kupela mañi ni mañi wa bona, ka Libizo la Jesu Kreste, Mulena. Ni lapela kuli Kreste yena Mwana Mulimu uka taha mwa lipilu za mutu ni mutu wa luna, Mulena, mi alu bupe ni ku lu eza kuba libupiwa zenza ku Jesu Kreste. Lumeleza cwalo, Mulena Mulimu.

<sup>332</sup> Lwa Ku lata. Mi lubata libupeho za luna... cinceho ya luna kutaha ku luna, kuli lu kone kuba bana ba Hao, lu utwe Moya wa Hao ha uzamaya mwa lipilu za luna, Mulena, ka ku lu li sa ni ku lu lemuska za lusika lwa butanya lo lu pila ku lona loo. Lumeleza cwalo, Mulimu. Ha lubona basali nyana baba swasehile hahulu mwa litamo za diabulosi, mitangana, minahano ye lyangani, bana, bakomilwe ki milyani, ba zubi ba kwai, kunwa, kusa i swala, Edeni ya Satani.

<sup>333</sup> Mulimu, neku Ku tandezi lilimo ze sikisi sauzande, kuya ka Bibebe, fa ku bupa Edeni. Mi Wa beya mwana Hao wa mucaha ni musala hae mwani (munyaliwa wa hae), kuli ba i buse. Mi Satani ataha mi a ikelusa; una ni lilimo ze sikisi sauzande, mi uyahile Edeni ya hae ya mihupulo ka sayansi, ni tuto, ni ze bizwa kuli butali, mi u ibile mwa busafa bwa lifu.

<sup>334</sup> O Mulimu, luise hape kwa Edeni, Mulena, ko kusina lifu, ko kusina maswabi. Lumeleza cwalo, Mulena. Lu yemi ka kuishuwa, lu libelela Adama wa bubeli kutela Munyaliwa wa Hae. Lu eze kuba siemba sa Hae, Ndate. Lu lapela ka Libizo la Jesu. Amen.

<sup>335</sup> Kana mwa lata Mulimu? Kana mwa utwa... Kikuli mwa lika ku lemuha se Ni lika ku mi bulelela? Haiba mwa kona ku utwisia, mu nanule fela mazoho a mina, muli, "Na utwisia so lika ku bulela." Kana mwa bona bupulumuki bwa lusika lo nji? Mutualime mo bu zamaezi, hakusana ni haiba libaka mwahala batu ni hanyinyani. Li icongile! Li kai zaluna...? Ni haiba baeteleli.

<sup>336</sup> Mutualime ku Mueteleli wa luna wa naħħa! "Haiba nji ba bata Swalisano, ha ba be ni yona. Kaufela seo sicaba si bata, ha babe ni sona." Uka i Patrick Henry wa luna, George Washington wa luna? Ba kai baeteleli ba luna ba bakona ku yemela mulao? Halusana ni bona ni hanyinyani.

<sup>337</sup> Liki i likeleke za luna, bakutazi ba luna? Bakanga batu ka ku ba lika fela fa nako nyana, kamba kukena mwateni, ku i kopanya kwa keleke ni kueza se kamba kuba ni maikuto nyana a kusimuka kamba sesiñwi. Baka i baana ba Mulimu bani, bapolofita bani ba balika ku yema ni kubata ku silafala, ku nyefula lika za lifasi kaufela?

<sup>338</sup> Baka i baana bani ba busepahali? Ba kai kanti? Se bali baba bunolo hahulu, mi ka minahano ya butu ni zeñwi, kufitela ba tokwa kuba fa ni hanyinyani. O Mulimu, ulu utwele butuku.

<sup>339</sup> Ona lika ze sabisa ze tahela lifasi ze. Mwa kona kubona mo sicaba si kenela mwahala lika zani. Ki bupulumuki. Kono cwale sika sani ha si ka ezahala, Keleke ikaba iile.

<sup>340</sup> Mulimu, lu tuse kuba kwani. Yani kona tapelo yaka kwa Sibupiwa sa Buipiteli se sili mwa muyaho wo busihu bwa kacenu, yena Kreste yomutuna ya sa na ni Bupilo Bobusafeli. Na Ku lapela, Kreste, sina ha Ni li mo ni meto aka inza kwaluhile, kutalima fa keleke Yo liuluzi ka Mali a Hao. Mulimu, usike wa lumeleza kuli alimuñwi wa luna a latehe. Lu bata kuba ka kuluka ni Wena. Kacwalo ulu kenise, O, Mulena, kuzwa kwa bumaswe bwa luna kaufela. Takula libi za luna kaufela ni lika zeñwi.

<sup>341</sup> Lu Ku boni ha ufolisa bakuli ba luna, mane ni haiba kuzusa bakuli ba luna (haba kutela kwa bupilo ka tapelo), mi lu boni lika ze kaufela ha li ezahala, Ndate. Cwale lu *kutiseze* kwa Bupilo, ka moyā; lu kutiseze kwa temuho ya Bupilo Bobusafeli ka Kreste Jesu. Lumeleza se, Ndate. Ni li beya kaufela zona ku Wena. Ka Libizo la Jesu Kreste.

Kufitela lu kopana! kufitela lu kopana!  
Kufitela lu kopana kwa mautu a Jesu;  
Kufitela lu kopana!

Mutalime ku Yena. Mutuhele Yena alu nolofaze.

...lu kopana!  
Mulimu abe ni mina kufitela lu kopana hape!

<sup>342</sup> Lu nanule mazoho aluna cwale:

Kufitela lu kopana! kufitela lu kopana!

Muzwale Salano, kamba ki mañi kaufela ya tatama.  
[Yomuñwi uli, “Sesiñwi kaufela?”—Mu.] Batili. Mulimu ami  
fuyole.



*BUETELELI* LOZ65-1207  
(Leadership)

Liñusa le ka Muzwale William Marrion Branham ne li katalizwe lwa pili mwa Sikuwa la Bubeli manzibwana, Ñulule 7, 1965, fa mukopano wa ba Full Gospel Business Men's Fellowship International ili kwa Covina Bowl mwa Covina, California, U.S.A., iingilwe kuzwa fa tepu ya magesi ya manzwi ni ku hatisiwa kusina kuzusa sika mwa teni kuya Sikuwa. Toloko ye ya mwa Silozi nei hatisizwe ni ku hasanyiwa kiba Voice Of God Recordings.

LOZI

©2017 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Zibiso ya bahatisi

Litukelo kaufela li bulukilwe. Buka ye yakona kupulintwa fa pulinta ya mwa ndu kuli iitusiswe ki mutu kamba kuli ifiwe ku yomnwi, mahala feela, kakuba siitusiso sa ku hasanya Evangelí ya Jesu Kreste. Buka ye hailekiswi, kuatiswa mwa buńata, ku nepelwa fa moyá wa webusaiti, ku bulukwa mwa mukwa wo bunolo, ku tolokwa mwa mishobo isili, kamba ku itusiswa kwa kukupa masheleńi ku sina tumelelano niba Voice Of God Recordings®.

Ka litaba zeńata kamba ka libuka zeńwi ze liteni, shangwe muńolele kwa:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)